

M321: Nibelungenlied

- 0,1 auentiure von den Nibelungen .
- 1,1 UNS . IST . In alten maeren . wnd's vil geseit .
1,2 von heleden lobebaeren . vo- grozer arebeit .
1,3 von frevde vn- hochgeciten von weinen vn- klagen .
1,4 von kvner recken striten . mvget ir nv wnd' horen sagen .
- 2,1 Ez whs in Bvregonden . ein vil edel magedin .
2,2 daz in allen landen . niht schon's mohte sin .
2,3 Chriemhilt geheizen . div wart ein schone wip .
2,4 dar vmbe mvsin degene . vil v'liesen den lip .
- 3,1 Ir pflagen dri kunige . edel un- rich .
3,2 Gunther un- Gernot . die rechen lobelich .
3,3 vn- Giselher d' iunge . ein wetlich' degen .
3,4 div frowe was ir swester die helde heten s in ir pflegen .
- 4,1 Ein richiv chuniginne . frov Vte ir mvt' hiez .
4,2 ir vat' d' hiez Dancrat . d' in div erbe liez .
4,3 sit nach sime lebene . ein ellens rich' man .
4,4 d' ovch in siner iugende . grozer eren vil gewan .
- 5,1 Die h'ren waren milte . von arde hoh erborn .
5,2 mit kraft vn-mazen chvne . die rechen vzerchorn .
5,3 da z en Bvrgonden . so was ir lant genant .
5,4 si frvmten starchiv wnder . sit in Etzelen lant .
- 6,1 Ze wormze bi dem Rine . si wonten mit ir chraft .
6,2 in dienten von ir landen . vil stolziv ritt'schaft .
6,3 mit lobelichen eren . vnz an ir endes zit .
6,4 si sturben iaemerliche . sit von zweier frowen nit .
- 7,1 die dri kunige waren als ich gesaget han .
7,2 von vil hohem ellen . in waren vnd'tan .
7,3 ovch die besten rechen . von den man hat gesaget .
7,4 starch vn- vil chvone . in scharpfen striten vnv'zaget .
- 8,1 Daz was von tronege hagene . vn- ovch d' brud' sin .

- 8,2 Danchwart d' snelle . von Metzzen Ortwin .
8,3 die zwene Marcgrauen . Gere vn- Ekkewart .
8,4 Volker von Alzey . mit ganzem ellen wol bewart .
- 9,1 Rvomolt d' chvchenmeist' . ein vzerwelter degen .
9,2 Sindolt vn- Hvnolt . dise herren mvsin pflegen .
9,3 des hoves vn- d' eren . d' drier kunige man .
9,4 si heten noch manigen rechen . des ich genennen nienen kan .
- 10,1 Danchwart d' was marschalch . do was d' nefe sin .
10,2 Trvhsetzze des kuniges . von mezzen Ortwin .
10,3 Sindolt d' was schenche . ein wetlich' degen .
10,4 Hvnolt was chamerere . si chunden hoh' eren pflegen .
- 11,1 Von des hofes ere . vn- von ir witen chraft .
11,2 von ir vil hohen w'dekeit . vn- von ir ritt'schaft .
11,3 d' die herren pflagen . mit frevden al ir leben
11,4 des en chunde iv ze ware . niem- gar ein ende geben .
- 12,1 IN Disen hohen eren . trvmte Chriemilde .
12,2 wie si zvge einen valchen . starch schon vn- wilde .
12,3 den ir zwene arn erchrvmme- . daz si daz mvste sehen
12,4 ir en kunde in dirre w'lde . leid' nimm' geschehe- .
- 13,1 Den trvom si do sagete . ir mvoter . voten .
13,2 si ne chund es niht beschaiden . baz d' gyten .
13,3 "der valche den dv zivhest . daz ist ein edel man .
13,4 in welle got behvten . dv mvst in schier vloren han ."
- 14,1 "Waz saget ir mir von manne . vil liebiv mvt' min .
14,2 ane reche- minne . so wil ich imm' sin .
14,3 svs schon ich wil belibe- . vnz an minen tot .
14,4 daz ich von rechen minne . sol gewinnen nimm' not ."
- 15,1 "Nv ne v'sprich ez niht ze sere ." sprach ir mvt' do .
15,2 "solt v imm' h'ce-liche . z er w'lde werden vro .
15,3 daz chvmt von mannes minne . dv wirst ein schone wip .
15,4 ob dir got gefuget eins rehte gyten ritt's lip ."
- 16,1 "Die rede lat beliben . vil liebiv frowe min .
16,2 ez ist an manigen wiben . vil diche worden schin .
16,3 wie liebe mit leide . ze iungest lonen chan .
16,4 ich sol si miden beide . so ne chan mir nimm' misseگان ."
- 17,1 Chriemhilt in ir mvte . sich minne gar bewach .
17,2 sit lebete div uil gyte . vil manigen lieben tac .
17,3 daz si ne wesse niem- . den minnen wolde ir lip .
17,4 sit wart si mit eren . eines vil werden rechen wip .

- 18,1 Der was der selbe valche . den si in ir trvome sach .
18,2 den ir beschiet ir mvot' . wie sere si daz rach .
18,3 an ir nehsten magen . die in slvgen sint .
18,4 durch sin eines sterben . starp vil manich mvot' kint .
- 19, Auentur von Sivride wie der erzogen wart .
19,1 DO Wohs in nid'landen . eins edeln kuniges chint .
19,2 des vat' d' hiez Sigemvnt . sin mvt' Sigelint .
19,3 in ein' richen burge . witen wol bechant .
19,4 nidene bi dem Rine . div was ze Santen genant .
- 20,1 Sifrit was geheizen . d' snelle degen gvot .
20,2 er v'svchte vil d' riche . dvrch ellenthaften mvot .
20,3 durch sines libes sterche . svocht ' fremidiv lant .
20,4 hey waz er sneller degene . sit ze Buregonden vant .
- 21,1 E. daz d' degen chvne . vol whse ze man .
21,2 do het er solhiv wnd' . mit sin' hant getan .
21,3 da von man imm' mere . mac singen vn- sagen .
21,4 des wir in disen stunden . mvzen vil von im gedagen .
- 22,1 In sinen besten ziten . bi sinen iungen tagen .
22,2 man mohte michel wnder . von Sifriden sagen .
22,3 waz eren an im whse . vn- wie schone was sin lip .
22,4 des heten in ze minne . div vil wetlichen wip .
- 23,1 Man zoh in mit dem vlize . als im daz wol gezam .
23,2 von sin selbes tvgenden . waz zvht er an sich nam .
23,3 des wrden sit gezieret . sines vat' lant .
23,4 daz man in z allen dingen . so rehte herlichen vant .
- 24,1 Vil selten ane hvote . man riten lie daz kint .
24,2 in hiez mit waete zieren . sin mvt' Sygelint .
24,3 sin pflagen ovch die wisen . den ere was bekant .
24,4 des moht er wol gewinnen . beidiv lvot vn- lant .
- 25,1 Nv was er in d' sterche . daz er wol waffen trvoch .
25,2 swes er da zv bedorfte . des lag an im genvoch .
25,3 do begvnd ' sinnen . werben schoniv wip .
25,4 die trvoten wol mit eren . den sinen wetlichen lip .
- 26,1 Do hiez sin vat' sigemvnt . chunden sinen man .
26,2 er wolde hochgecite . mit lieben friunden han .
26,3 div maere man do furte . in vremd' kunige lant .
26,4 den gestalten vn- den chunden . gap man rosse vn- ovch gewant .
- 27,1 Swa man vaNT deheinen . d' ritt' solde sin .

- 27,2 von art d' sine- mage . div edeln kindelin .
27,3 dv ladet man zv dem lande . durch die hochgecit .
27,4 mitsamt dem iungen kunige . sw't genam- si sit .
- 28,1 Von d' hochgecite . man mohte wnd' sagen .
28,2 Sigemvnt vn- Sigelint . die chvnden wol beiagen .
28,3 mit gvte michel ere . des teilte vil ir hant .
28,4 des sah man vil d' fremden . zvv in riten in daz lant .
- 29,1 Vier hund't sw'tdegene . die solden tragen chleit .
29,2 mit dem iungen kunige . vil manic schoniv meit .
29,3 mit w'che was vnmvzich . wande si in waren holt .
29,4 vil d' edeln steine . die frowen leiten in daz golt .
- 30,1 Die si mit porten wolden . wrchen vf ir wat .
30,2 den stolzen sw'tdegenen des en was niht rat .
30,3 der wirt d' hiez do sidelen . vil manigem chvne- man .
30,4 z einen svnewenden . da er die hochgecite wolde han .
- 31,1 Do gie z einem mvnst' . vil manic rich' kneht .
31,2 vn- vil d' edeln ritt' . die wisen heten reht .
31,3 daz si den tumben dienten . als in was e getan .
31,4 si heten kvrzwile . vn- ovch vil manig' vrovden wan .
- 32,1 Got man z en eren . ein messe sanc .
32,2 do wart von den lvten . vil michel d' gedranch .
32,3 da si ze ritt' wrden . nach ritt'lich' e .
32,4 mit also grozzen eren . daz wetlich imm' me erge .
- 33,1 Si liefen da si funden . gesatelt manic march .
33,2 in hofe Sigemundes . d' bvhurt wart so starch .
33,3 daz man erdiezen horte . Palas vn- Sal .
33,4 die hochgemvten degene . heten vrolichen scal .
- 34,1 Von wisen vn- von tumben . man horte manigen stoz .
34,2 daz d' schefte brechen . gein dem lufte doz .
34,3 Trunzvne sach man vliegen . fur den palas dan .
34,4 da sahen churzewile . beidiv wip vn- ovch die man .
- 35,1 Der chunich bat iz lazen . do zoch man dan div march .
35,2 man sach ovch da zebrochen uil manige bukkel starch .
35,3 vil der edeln steine . geuellet vf daz gras .
35,4 an liechten schildes spangen . von hvrtten daz geschehen was .
- 36,1 Do giengen s wirtes geste . da man in sitzen riet .
36,2 vil d' edeln spise . si von d' mvode schiet .
36,3 vn- win d' allerbeste . den man mit vollen trvoch .
36,4 den vremden vn- den kunden . bot man eren da genvoch .

- 37,1 Solch' kurcewile si pflagen al den tac .
37,2 vil d' varnd' diete . rwoe sich bewac .
37,3 si dieten nach d' gabe . die man da riche vant .
37,4 des wart mit lobe gezieret . allez Sigemundes lant .
- 38,1 Der h're hiez do lihen . sinen svn den iungen man .
38,2 lant un- purge . als er e het getan .
38,3 den sinen sw'tgenozen . gap do vil sine hant .
38,4 do liebt in do div reise . daz si chomen in daz lant .
- 39,1 Div hochgecite do werte vnz an den sibenden tac .
39,2 Sigelint div riche . nach alten siten pflac .
39,3 durch ir kindes liebe . geben rotez golt .
39,4 si kund ez wol gedienen . daz si ir svne warn holt .
- 40,1 Lutzel deheinen varnden armen man da vant .
40,2 rosse vn- kleider . daz stvop in von d' hant .
40,3 sam si ze lebene heten mer deheinen tac .
40,4 ich wene ie ingesinde . so grozzer milte gepflac .
- 41,1 MIIt lobelichen eren . schiet sich div hochgecit .
41,2 von des landes h'ren . hort man wol sit .
41,3 daz si den iungen wolden . z eime vogete han .
41,4 des en wolde in do niht volgen . Sifrit d' wetlich man .
- 42,1 Sit daz noch beide lebten . Sigemunt vn- Sigelint .
42,2 niht wolde tragen krone . noch ir liebez kint .
42,3 doch wold ' wesen h're . fur allen den gewalt .
42,4 des in den landen vorhte . d' degen kvn vn- balt .
- 43,1 In dorfte niemen schelten . sit do er wafen genam .
43,2 ia gerwoete vil selten . d' reche lobesam .
43,3 svchte niwan striten . sin ellenthaftiv hant .
43,4 tet in z allen ziten . in vremeden richen wol bekant .
- 44, Auentur wie Sivrit ze wormze chome .
44,1 DEn h'ren mvten selten . deheiniv h'cenleit .
44,2 er horte sagen maere . wie ein schoniv meit .
44,3 in Burgonden waere . ze wnsche wol getan .
44,4 da von er sit vil arebeit . vn- ovch frevden gewan .
- 45,1 Div ir vnmazen schone . was vil witen chunt .
45,2 vn- ir vil hoch gemvte . zv d' selben stunt .
45,3 an d' iunchfrowen . so manic helt ervant .
45,4 ez ladete vil d' geste . in daz Gvnth'es lant .
- 46,1 Swaz man nach ir minne . d' werbende- sach .

- 46,2 Chriemhilt in ir sinne . ir selb' nie v'iach .
46,3 daz si deheinen wolde . z eime trvte han .
46,4 er was ir noch vil vremde . dem si wart sider vnd'tan .
- 47,1 Do gedaht vf hohe minne . daz Sigelinde chint .
47,2 ez was ir aller werben . wid' in ein wint .
47,3 er mohte wol v'dienen . schon' frowen lip .
47,4 sit wart div edel Chriemh' . des starchen Sifrides wip .
- 48,1 Im rieten sine mage . vn- genvge sine man .
48,2 sit daz er vf minne . vlizzen sich began .
48,3 daz er eine naeme . div im mohte zemen .
48,4 Do sprach d' h're Sifrit . "so wil ich Chriemh' nemen .
- 49,1 Die edeln iuncfrowen . vz Burgonden lant .
49,2 durch ir vil grozen schone . vo- sage ist mir bechant .
49,3 nie keiser wart so riche . d' wolde haben wip .
49,4 im en zaeme wol ze mi-nen . d' iungen kuniginne lip ."
- 50,1 Disiv selben maere . v'nam do Sigemvnt
50,2 ez reite sin gesinde . da uon wart im chunt .
50,3 d' wille sines kindes . was im grimme leit .
50,4 daz er werben wolde . die vil h'lichen meit .
- 51,1 Ez gefriesch ovch Sigelint . des edeln kuniges wip .
51,2 si hete grozze sorge . vmbe ir kindes lip .
51,3 den vorhte si v'liesen . von Gunth's man .
51,4 den gewerp man do dem degene . sere leiden began .
- 52,1 Do sprach d' starche Sivrit . "vil lieb' vat' min .
52,2 ane edeler frowen minne . wolde ich imm' sin .
52,3 ich en wrbe dar min h'ce . vil groze liebe hat .
52,4 swaz ieman reden chunde . des ist dehein' slahte rat ."
- 53,1 "Sit dv niht wil erwinden ." sprach d' kunic do .
53,2 "so bin ich dines willen . inneklichen vro .
53,3 vn- wil dir z helfen fugen . so ich beste chan .
53,4 doch hat d' chunic Gvnth' . vil manigen vb'mvten man .
- 54,1 Ob ez and' niem- waere . wan hagene d' degen .
54,2 d' chan mit vb'mvte . d' hochv'te pflegen .
54,3 daz ich vil sere fvrhte . de iz vns werde leit .
54,4 ia ist mir solh' maere . dicke vil von in geseit ."
- 55,1 "Waz mag vns daz gew'ren ." sprach do Sifrit .
55,2 "swaz ich friwentliche niht ab in erbit .
55,3 daz mac doch mit ellen . erwerben wol min hant .
55,4 ich trow im an ertwingen . bediv lvt vn- lant ."

56,1 Do sprach d' furste Sigemvnt . "din rede div ist mir leit .
56,2 wan wrden disiv maere . ze Rine geseit .
56,3 dv ne dorftes nimm' . geriten in daz lant .
56,4 Gunth' vn- Gernot . sint mir lange wol bekant .

57,1 Mit gewalt niem- . erwerben mac die meit ."
57,2 so sprach d' kunic Sigemvnt . "daz ist mir wol geseit .
57,3 wellen ab' wir mit rechen . riten in daz lant .
57,4 vnsern besten friwenden . sol div reise sin bechant ."

58,1 "Des en ist mir niht ze mvote ." sprach do Sifrit .
58,2 "daz mir svln rechen . ze Rine volge- . mit .
58,3 durch deheine hervart . daz were mir leit .
58,4 da mit ich solde ertwingen . die vil h'lichen meit .

59,1 Si mac svs wol erw'ben . da min eines hant .
59,2 ich wil mit zwelf gesellen in Gunth's lant .
59,3 dar sult ir mir helfen . vat' Sigemunt ."
59,4 do gap man sinen degenen . ze kleiden gra . vn- punt .

60,1 Do v'nam ovch disiv maere . sin mvt' Sigelint .
60,2 si begunde trvren . vmbe ir liebez kint .
60,3 ia vorhte si vil sere . die Gunth'es man .
60,4 div edele kuniginne . dar vmbe weinen began .

61,1 Do chom d' herre Sivrit . da er die frowen sach .
61,2 wid' sine mvt' gvetlich er sprach .
61,3 "ir n svlt niht weinen . durch den willen min .
61,4 ia wil ich ane sorge . vor allen wiganden sin .

62,1 Nv helfet mir der reise . in Burgonden lant .
62,2 daz ich un- mine rechen . haben solch gewant .
62,3 daz so stolze degene . mit eren mvgen tragen .
62,4 des wil ich genade . iv mit triwen imm' sagen ."

63,1 "Sit dv niht wil erwinden ." sprach do Sigelint .
63,2 "so hilf ich dir d' reise . min einigez kint .
63,3 mit d' besten waete . die ritt' ie getrvoch .
63,4 dir vn- den dinen degenen . ir sult ir furen genvoch ."

64,1 Des neig ir mit zvhten . d' vil chvne man .
64,2 er sprach "ich wil z er verte . niem- mere han .
64,3 niwan zwelf gesellen . den sol man prufen wat .
64,4 ich wil v'svchen gerne . wie ez vmbe Chriemhilde stat ."

65,1 Da sazen schone frowe . naht un- tac .
65,2 luzzil dehein' mvoze . ir deheiniv pflach .

- 65,3 vnze si geworhten die sifrides wat .
65,4 er wolde sin' verte . han dehein' slahte rat .
- 66,1 Sin vater hiez im zieren . sin ritt'lich gewant .
66,2 da mit er varn wolde . in Burgonden lant .
66,3 die ir uil liechten brunne . die wrden ovch bereit .
66,4 vn- ir vil gvten helme . ir schilde schon vn- breit .
- 67,1 Do nahet in ir reise . z en Burgonden dan .
67,2 si heten vmbe ir sorge . wi ez im solde ergan .
67,3 ob si imm' wid' solden . chom- in daz lant .
67,4 do svomte man den degenen . von dannen waffen vn- gewant .
- 68,1 Ir rosse div warn schone . ir gereite goldes rot .
68,2 lebt iem- vb'mvt' des en was niht not .
68,3 denne waere Sivrit . vn- die sine man .
68,4 wie schone er vrlovbes gerte z en Burgonden dan .
- 69,1 In werte trvorchliche . d' kunic vn- ovch sin wip .
69,2 er troste minneklichen . do ir beid' lip .
69,3 er sprach "ir suolt niht weinen . durch den willen min .
69,4 imm' ane sorge . mvget ir wol mines libes sin ."
- 70,1 Ez was leit den rechen . ez weint ovch manic meit .
70,2 ich waen in hete rehte . ir herce daz geseit .
70,3 daz in so vil ir friwende . da von gelege tot .
70,4 von schulden si do klageteten . des gie in endeliche not .
- 71,1 An dem sehsten morgen . ze wormze vf den sant .
71,2 riten die vil chunen . allez ir gewant .
71,3 was uon rotem golde . ir gereite wol getan .
71,4 ir ross div giengen ebene . des h'ren Sifrides man .
- 72,1 Ir schilde warn niwe . starc vn- breit .
72,2 vn- licht ir helme . da ze hove reit .
72,3 Sifrit d' vil chune . in Gunth'es lant .
72,4 man gesach an heleden . nie so h'lich gewant .
- 73,1 Div ort d' swerte giengen . nid' vf die sporn .
73,2 ez furten scharpfe geren . die ritt' vzerchoren .
73,3 Sivrit d' furt ir einen . wol zweier spannen breit .
73,4 d' ze sinen ekken . harte vreislichen sneit .
- 74,1 Die goldes roten zevme . furten s an d' hant .
74,2 von siden furgebuge . sus chomen s in daz lant .
74,3 daz volch si allenthalben . kapfen an began .
74,4 do liefen in engegene . des kunic Gunth'es man .

- 75,1 Die hochgemvten rechen . ritt' vn- knehte .
75,2 die sprungen in begegene . daz was michel reht .
75,3 vn- enpfiegen dise geste . in ir herren lant .
75,4 si nam- in die moere . vn- ir schilde von d' hant .
- 76,1 Div ross si wolden dannen . ziehen an ir gemach .
76,2 Sifrit d' starche . zv den helden sprach .
76,3 "Lat uns noch die moere . eine wile stan .
76,4 wir wellen schiere hinnen . des ich gvten willen han .
- 77,1 Man sol ovch uns' schilde . nind' von uns tragen .
77,2 wa ich den kunic uinde . kan mir daz iemen sagen .
77,3 Gunth'n den richen . vz burgonden lant ."
77,4 do saget ez im ir einer . dem iz rehte was bekant .
- 78,1 "Welt ir den kunic uinden . daz mac vil wol geschehen .
78,2 vf ienem sal witen . han ich in gesehen .
78,3 bi den sinen degenen . welt ir zvz im gan .
78,4 ir mvget da vor im vinden . manigen vzerwelten man ."
- 79,1 Do waren ovch dem kunige . div maere nv geseit .
79,2 daz vf sinem hofe waeren . ritt' vil gemeit .
79,3 die furten liehte brunne . vn- herlich gewant .
79,4 si en kande niem- in d' Burgonden lant .
- 80,1 Den wirt des hete wnd' . von wanne koem- dar .
80,2 die h'liche rechen . in waete lichtgevar .
80,3 un- mit so schonen schilden . niwe un- breit .
80,4 daz im daz niem- sagete . daz was im groezliche leit .
- 81,1 Des antwrte ein reche . d' hiez ortwin .
81,2 starch un- chvone . moht ' wol sin .
81,3 "sit wir ir niht erchennen . so sult ir heizen gan .
81,4 nach mime hoheim hagene . den sul wir si sehen lan .
- 82,1 Dem sint kunt div riche . vn- ovch div fremden lant .
82,2 mag er si bekennen . daz tvot er uns bechant ."
82,3 In hiez d' chunic bringen . mit den sinen man .
82,4 sach man in zvhtekliche . ze hofe fur den chunic gan .
- 83,1 Waz sin d' kunic wolde . des vragete hagene .
83,2 "ez sint in mime huse . vremde degene .
83,3 die niem- hie bekennet . ob ir si e gesehen .
83,4 habt in vremden landen . des svlt ir hagene mir v'iehen ."
- 84,1 "Daz tvn ich sich'liche ." z einem venst' er do gie .
84,2 sin ovge er do wenchen . zv den gesten lie .
84,3 wol behagete im ir geverte . vn- ovch ir gewant .

- 84,4 si warn im vil vremde . in d' Burgonden lant .
- 85,1 Er sprach "von swannen furen . die rechen an den Rin .
85,2 ez mohten selbe fursten . od' furstenboten sin .
85,3 Ir ross div sint so schone . ir chleid' harte gvot .
85,4 swannen si ioch riten . si sint vil hohe gemvot ."
- 86,1 Also sprach do Hagene . "als ich mich kan v'stan .
86,2 swie ich Sifriden noh nie gesehen han .
86,3 so wil ich wol getrowen . swie ez sich gefuget hat .
86,4 so ist ez d' reche . d' dort so herlichen stat .
- 87,1 Er bringet niwe maere . her in dizze lant .
87,2 die Chvne- Nibelunge . slvch des heldes hant .
87,3 Schilbunc vn- Nibelunch . div richen kuniges chint .
87,4 er frumte starchiv wnd' . mit sin' grozen chrefte sint .
- 88,1 Da d' helt aleine . an alle helfe reit .
88,2 er vant vor einem berge . daz ist mir wol geseit .
88,3 Bi Nibelunges horde . vil manigen kunen man .
88,4 die warn im e fremde . vnz er ir chunde da gewan .
- 89,1 Hort der nibelunges . d' was gar getragen .
89,2 vz einem holn b'ge . nv horet wnd' sagen .
89,3 wie in teilen wolden . d' Nibelunge man .
89,4 daz sach der degene Sifrit . den helt es wndern began .
- 90,1 Er chom zvv in so nahen . daz er die rechen sach .
90,2 vn- ovch in die degene ir einer dr und' sprach .
90,3 hie chumt d' starch Sivrit . d' helt von Nid'lant .
90,4 vil seltseniv maere . er an den Nibelunge- vant .
- 91,1 Den rechen wol enpfiegen . Schilbunc vn- Nibeluch .
91,2 mit gemeine- site . die edeln fursten iunch .
91,3 den schaz in baten teilen . den vil chunen man .
91,4 vn- baten s in so lange . vnz er in z loben began .
- 92,1 Er sach so vil gesteines . als wir horen sagen .
92,2 hund't Chantzwaegene . ez mohten niht getragen .
92,3 noch me des roten goldes . von Nibelunge lant .
92,4 daz solde in allez teilen . des chunen Sifrides hant .
- 93,1 Do gaben si im ze miete . daz Nibelunges sw't .
93,2 si wrden mit dem dienste . vil vbele gew't .
93,3 den in da leisten solde . d' vil chune man .
93,4 er n kund es niht v'enden . do wart d' helt von in bestan .
- 94,1 DE n schatz er vngeteilet . beliben mvse lan .

- 94,2 do begunden mit im striten . d' zweier kunige man .
94,3 mit ir vat' swerte . daz Palmvnc was genant .
94,4 ez streit ab in d' chune . den hort vn- Nibelung lant .
- 95,1 Si heten da ir friunde . zwelf chune man .
95,2 die starch als risen warn . waz chund ez si v'van .
95,3 die slvoch sit mit zorne . div Sifrides hant .
95,4 vn- rechen Siben hund't . dwang er von Nibelunge lant .
- 96,1 Dar zv die richen kunige . die slug er beide tot .
96,2 er chom von Albriche . sit in groze not .
96,3 d' wande sine herren . rechen da zehant .
96,4 vnz er die grozen sterche . sit an Sifride vant .
- 97,1 Do ne chunde im gestriten . daz starche getwerch .
97,2 alsam die Lewen wilde . si liefen an den berch .
97,3 da er die Tarnkappen . Albrichae ane gewan .
97,4 do wart des hordes herre . Sifrit d' vil chune man .
- 98,1 Die da getorsten striten . die lagen alle erslagen .
98,2 den schatz hiez er do balde . furen vn- tragen .
98,3 da in e da namen . die Nibelunges man .
98,4 Albrich d' vil starche . do die kameren gewan .
- 99,1 Er mvos im swern eide . er dient im so sin kneht .
99,2 all' hande dienste . was er im gereht ."
99,3 so sprach von Tronege Hagene . "daz hat er getan .
99,4 also grozer chrefte . nimere reche gewan .
- 100,1 Noch weiz ich an im mere . daz mir ist bekant .
100,2 einen lintrachen . sluoch des heledes hant .
100,3 do badet er in dem blvot . des ist d' helt gemeit .
100,4 von also vest' hvte . daz in nie wafen sit v'sneit .
- 101,1 Nv svln wir den rechen . enpfahen desten baz .
101,2 daz wir iht v'dienen . den sinen starchen haz .
101,3 sin lip d' ist so chune . man sol in holden han .
101,4 er hat mit sinen ellen so maenigiv wnd' getan ."
- 102,1 Do sprach d' chunich riche . "dv maht wol haben war .
102,2 nv sich wie degenliche . er stet gein strites var .
102,3 er unt die sine degene . d' wnd'chune man .
102,4 wir suln im begegene . hin nid' zv dem rechen gan ."
- 103,1 "Daz mvgt ir" sprach do Hagene . "wol mit eren tvn .
103,2 er ist von hohem chunne . eines richen kuniges svn .
103,3 er stet in d' gebaere . mich dunchet wizze christ .
103,4 ez en sin niht kleiniv maere . dar vmbe er her geriten ist ."

- 104,1 Do sprach d' wirt des landes . "nv si vns willechomen .
104,2 er ist edel un- chvone . daz han ich wol v'nom- .
104,3 des sol ovch er geniezen . in Burgonden lant ."
104,4 do gie d' chunic Gunth' da er Sifriden vant .
- 105,1 Der wirt vn- sine rechen . enpfiegen so den gast .
105,2 daz in an ir zvhten . wenich iht gebrast .
105,3 des begunde in nigen . d' vil chune man .
105,4 man sah in zvhtekliche . mit den sinen rechen stan .
- 106,1 "Mich wnd't dirre maere ." sprach d' wirt zehant .
106,2 "von wanne ir edel Sifrit . sit chom- in daz lant .
106,3 od' waz ir w'bet . ze wormez an den Rin ."
106,4 do sprach d' gast z em kunige . "daz sol ivch vnv'daget sin .
- 107,1 Mir wart gesaget maere . in mins vat' lant .
107,2 daz hie bi iv waeren . daz het ich gern erkant .
107,3 die chunsten rechen . des han ich vil v'nom- .
107,4 die ie kunic gewnne . dar vmbe bin ich her bechom- .
- 108,1 Ovch hort ich iv selben . d' degenheite iehen .
108,2 daz man kunic deheinen . chun' habe gesehen .
108,3 des giht iv vil d' lute . vb' elliv disiv lant .
108,4 nv ne wil ich niht erwinden . vnz ez mir werde bechant .
- 109,1 Ich bin ovch reche . vn- solde chrone tragen .
109,2 ich wil daz gern fugen . daz si von mir sagen .
109,3 daz ich habe von rehte . lute vn- lant .
109,4 dar vmbe sol mi- ere . vn- min hovbt wesen pfant .
- 110,1 Nv ir sit so chune . als mir ist geseit .
110,2 ia ne rvche ich ist ez iemen . liep od' leit .
110,3 ich wil an iv ertwingen . swaz ir mugt han .
110,4 lant vn- burge . daz sol mir wesen allez und'tan ."
- 111,1 Den chunic hete wnd' . vn- sine man allesam .
111,2 vmbe disiv maere . die er hie v'nam .
111,3 daz er des hete willen . er naeme im siniv lant .
111,4 daz horten sine degene . do wart in zvernen bechant .
- 112,1 "Wie hete ich daz v'dienet ." sprach Gunth' . der degen .
112,2 "des min vat' lange . mit eren hat gepflegen .
112,3 daz wir daz solden vliesen . von iemannes kraft .
112,4 wir liezen vbel schinen . daz ovch wir pflegen ritt'schaft ."
- 113,1 "Ich en wil es niht erwinden ." sprach ab' d' chune man .
113,2 "ez en mvge von dinem ellen . din lant den vride han .

- 113,3 ich wil s alles walten . vn- ovch div erbe min .
 113,4 erwirbes tv z mit ellen . die svln von rehte wesen din .
- 114,1 Din lant vn- ovch daz mine . suln geliche ligen .
 114,2 swed' uns' ein' . a m and'n mac gesigen .
 114,3 dem sol ez allez dienen . die lute vn- ovch div lant ."
 114,4 da wid' redet aleine . d' h're Gernot zehant .
- 115,1 "Wir han des niht gedingen ." sprach do Gernot .
 115,2 "daz wir iht lande irtwingen . daz iemen dr umbe tot .
 115,3 gelige vor rechen handen . wir haben richiv lant .
 115,4 div dienen vns von rehte . ze nieman sint si baz bewant ."
- 116,1 IN vil grimme- mvote . da stunden die friunde sin .
 116,2 do was ovch dar vnd' . d' herre Ortwin .
 116,3 d' sprach "disiv svone . ist mir von h'cen leit .
 116,4 iv hat d' starche Sifrit . vnv'dienet wid'seit .
- 117,1 Ob ir vn- iw' brud' . hetet niht die wer .
 117,2 vn- ob er danne furte . ein michil kuniges her .
 117,3 ich trwote wol erstriten . daz d' chune man .
 117,4 die grozen vb'mvete von warn schulden mvse lan ."
- 118,1 Daz zvrnde harte sere . d' helt von Nid'lant .
 118,2 "sich en sol niht v'mezzen . wid' mich din hant .
 118,3 ich bin ein kunic riche . so bis tv kuniges man .
 118,4 ia en zimt dir niht mit strite . deheinen minen genoz bestan ."
- 119,1 Nach swerten rief do sere . von Metzen Ortwin .
 119,2 er mohte Hagenen swester suon . von Tronege vil wol sin .
 119,3 daz d' so lange dagete . daz was dem kunige leit .
 119,4 do vnderstund ez Gernot . d' Ritt' kvone . vn- gemeit .
- 120,1 Er sprach ze Ortwine . "lat iw' zvrnen stan .
 120,2 vns en hat h're Sifrit . solhes niht getan .
 120,3 wir en mugen ez noch wol scheiden . mit zvhten de st min rat .
 120,4 vn- haben in ze frivnde . daz uns lobelich' stat ."
- 121,1 Des antwrte Hagene . "vns mac wol wesen leit .
 121,2 allen iwarn degenen . daz er ie gereit .
 121,3 durch striten h' ze Rine . er sold ez haben lan .
 121,4 im heten min h'ren . solh' leide niht getan ."
- 122,1 Do sprach ab' Sifrit . d' chreftige man .
 122,2 "mvte ivch daz her Hagene . daz ich gesprochen han .
 122,3 so sol ich lazen chiesen . daz die hende min .
 122,4 wellent vil gewaldech . hie z en burgonden sin ."

- 123,1 "Daz sol ich eine wenden ." sprach do Gernot .
123,2 allen sinen degenen . reden er v'bot .
123,3 iht mit vb'mvete . des im waere leit .
123,4 do gedaht ovch Sifrit . an die vil h'lichen meit .
- 124,1 "Wie zaeme vns mit iv striten ." sprach ab' Gernot .
124,2 "swaz helde nv dar und' . mvsen ligen tot .
124,3 wir heten s luzzil ere . ob wir ez wolden tvon ."
124,4 des antwrt sifrit . des kunic Sigemundes sun .
- 125,1 "War umbe bitet Hagene . vn- ovch Ortwin .
125,2 daz er niht gahet striten . mit den frivnden sin .
125,3 d' er also manigen . hie ze lande hat ."
125,4 si mvsin rede v'miden . daz was Gernotes rat .
- 126,1 "Ir sult vns wesen willechom- ." sprach Giselh' daz kint .
126,2 "vn- iw' hergesellen . die hie mit iv sint .
126,3 wir suln iv gerne dienen . ich un- die mage min ."
126,4 do hiez man den gesten . schenchen Gunth'es win .
- 127,1 Do sprach d' wirt des landes . "allez daz wir han .
127,2 gervchet ir s nach eren . daz si iv vnd'tan .
127,3 vn- si mit iv geteilet . lip un- gvot ."
127,4 do wart d' h're Siurit . ein luzzel senft' gemvot .
- 128,1 Do hiez man in behalten . alliz ir gewant .
128,2 man gab in h'berge . die besten die man vant .
128,3 Sivrides knappen . man schvof in gvot gemach .
128,4 den gast man sit vil gerne . da z en Buregonden sach .
- 129,1 Man bot im michel ere . dar nach ze manigen tage-
129,2 tusint stunden mere . danne ich iv kunde gesagen .
129,3 daz hete v'scholt sin ellen . ir svlt wol wizzen daz .
129,4 in sach vil luzzil iemen . der im were gehaz .
- 130,1 Sich vlizzen kurzewile . die kunige vn- ovch ir man .
130,2 so was er ie d' beste . swes man da began .
130,3 des chunde im volgen niemen . so michel was sin kraft .
130,4 so si den stein wrfen . od' schuzzen den schaft .
- 131,1 Swa so vor den frowen . durch ir hofscheit .
131,2 churzewile pflagen . die ritt' vil gemeit .
131,3 da sah man ie vil gern . den helt vz nid'lant .
131,4 er het vf hohe minne . sine sinne gewant .
- 132,1 Ze hofe die schonen frowen . vrageten mere .
132,2 wer der stolze vremde . reche were .
132,3 "sin lip d' ist so schone . vil riche . sin gewant ."

- 132,4 do sprachen ir genvge . “ez ist d’ chunic von Nid’lant .”
- 133,1 Swes iemen da begunde . des was sin lip bereit .
 133,2 er trvoch in sinem mvte . ein minnekliche meit .
 133,3 vn- ovch in ein div frowe . die er noch nie ne gesach .
 133,4 div im in heinliche . vil dicke gvtliche sprach .
- 134,1 Swenne vof em hofe wolde . spilen da div kint .
 134,2 ritt’ vn- knappen . daz sach vil dicke sint .
 134,3 Criemh’ durch div venst’ . div kuniginne her .
 134,4 dehein’ kurzewile . bedorfte div kuniginne mer .
- 135,1 Vn- wess er daz in sehe . die er in h’cen trvoch .
 135,2 da het er kurcewile . imm’ ane genvoch .
 135,3 solt ovoch er si sehen . ir sult gelovben daz .
 135,4 daz im in dirre w’lde . chunde nimm’ werden baz .
- 136,1 Swenn ’ bi den rechen . vf dem hofe stvnt .
 136,2 also noch die lute . durch kurzewile tvont .
 136,3 so stvnt so minnekliche . daz Sigelinde chint .
 136,4 daz in dvrch h’cenliebe . trvnte manic frowe sint .
- 137,1 Er daht ovch manige zite . “wie sol daz geschehen .
 137,2 daz ich die maget edele . mit ovgen mvge gesehen .
 137,3 die ich vo- h’cen minne . vn- lange han getan .
 137,4 div ist mir vil vremde . des mvz ich dicke truric stan .”
- 138,1 Swenne die kunige riche . riten in ir lant .
 138,2 so mvsin ie die rechen . mit in alzehant .
 138,3 da mit reit ovch Sifrit . daz was den frowen leit .
 138,4 er het durch hohe minne . dicke michel arebeit .
- 139,1 Svs wont ’ bi den herren . daz ist alwar .
 139,2 in Gunth’es lande . volleklich ein iar .
 139,3 daz er die minneklichen . die zite nie ne gesach .
 139,4 von d’ im sit vil liebe . vn- ovch vil leide geschach .
- 140, Auentur wie Sivrit mit den Sahsen streit .
- 1304,1 Gewalt des vbelen Hagenen . d’ duhte si ze starch .
 1304,2 si het ir opfergoldes . noch wol tusint march .
 1304,3 daz teilte si d’ sele . irs vil liebe- man .
 1304,4 daz dvohte Rvdegere . in grozen triwen getan .
- 1305,1 Do sprach div frowe Chriemh’ . “wa nv frivnde min .
 1305,2 die dvrch mich ellende . z en Hunin wellen sin .
 1305,3 vn- mit mir svln riten . in Ezelen lant .
 1305,4 die nemen golt daz mine . vn- chavffen rosse vn- ovch gewant .”

- 1306,1 Des antwrte ir schiere . d' marcgra Ekkewart .
1306,2 "sit ich iw' gesinde ie von erste wart .
1306,3 so entweich ich iv nie triwen ." sprach d' chune degn .
1306,4 "vn- wil iv imm' dienen . die wile wir beide lebn megn .
- 1307,1 Ich wil ovch mit mir fveren . hund't min' man .
1307,2 d' ich iv ze dienste . wol mit triwen gan .
1307,3 wir sin vngescheiden . ez en tvo d' tot ."
1307,4 d' rede neig im Chriemh' . daz ir z d' helt so wol erbot .
- 1308,1 Do zoh man dar die moere . si wolden varn dan .
1308,2 da wart vil michel weinen . von frivnden getan .
1308,3 frov Vte div gvote . vn- manic schoene meit .
1308,4 die zeigten daz in ware . nach d' kuniginne leit .
- 1309,1 Hvnd't schoner megede . div frowe mit ir nam .
1309,2 die wrden so gechleidet . als in daz wol gezam .
1309,3 vf ir vil liechten bovge . die trachene vielen nid' .
1309,4 si gelebten vil d' frevde . dort bi Ezelen sid' .
- 1310,1 IR brvoder chomen beide . Giselher un- Gernot .
1310,2 mit ir ingesinde . als in ir zvht gebot .
1310,3 do wolden si beleiten . ir liebe swester dan .
1310,4 ovch fvrten si ir degene . mit in wol tvsint chune man .
- 1311,1 Do chom d' snelle Gere . vn- ovch Ortewin .
1311,2 Rvmolt d' chuchen meist' . da mite mvse sin .
1311,3 si schvfen die nahtselde . d' frowen vf den wegn .
1311,4 Volcher was ir marschalch . d' solde ir herberge pflegen .
- 1312,1 Nach chussen michel weinen . wart da vil v'nomen .
1312,2 e daz si von d' burge . ze velde waern chomen .
1312,3 vz riten vn- giengen . die si s nie ne gebat .
1312,4 do reit d' chunic Gunth' . mit ir ein wenich fver die stat .
- 1313,1 E si von huse fveren . si heten fver gesant .
1313,2 ir boten harte snelle . in d' Hunin lant .
1313,3 die dem chvnige sageten . daz im Rvdeger .
1313,4 ze wibe hete gewnnen . die edeln chuniginne her .
- 1314,1 Di boten strichen sere . in was d' reise not .
1314,2 durch die grozen ere . vn- durch richiv potenbrot .
1314,3 do si ze lande waren . mit den maeren chomen .
1314,4 do het d' chunic Ezele nie so liebes niht v'nomen .
- 1315,1 Durch disiv lieben maere . hiez der chunic gebn .
1315,2 den boten solhe gabe . daz si wol mohten lebn .

- 1315,3 mit frevden immer mere . dar nach vnze an ir tot .
1315,4 mit liebe was verswunden . des chuniges chumber vnde NOT .
- 1316, Auentur wie Chriemhilt von wormze schiet do si gein den Hvnen fvoR
1316,1 DIe boten lazen riten . vn- tvn iv daz erchant
1316,2 wie div kvniginne . fvre dvrch daz lant .
1316,3 od' wa von ir cherten . ir brvd' beide wid' .
1316,4 si heten ir so gedienet . daz si s in mvse danchen sid' .
- 1317,1 Vrlovbes von ir gerte . do vil manic degen .
1317,2 si mvsin sich ze vergen . d' reise hine bewegn .
1317,3 do si wid' wolden . riten an den Rin .
1317,4 do ne moht ez ane weinen . von lieben frivnden niht gesin .
- 1318,1 Giselh' d' snelle . sprach z er swester sin .
1318,2 "swenne daz dv frowe . bedurfen wellest min
1318,3 ob dir iht gewerre . daz tvo mir bechant .
1318,4 so rite ich dir ze dienste . in daz Ezelen lant ."
- 1319,1 Die ir sippe waren . die chuste s an den munt .
1319,2 vil minneklichez scheiden . chos man an d' stvnt .
1319,3 die snellen Burgonden . von Rvdegeres man .
1319,4 do fvrt div kuniginne . manige magt wol getan .
- 1320,1 Hund't vn- viere . die trugen pfawenchleit .
1320,2 von genagelten richen pfellen . vil d' schilde breit .
1320,3 man fvrt bi den frowen . nahen vf den wegn .
1320,4 do nam ovch vrlovp Volker . d' vil zierliche degn .
- 1321,1 Do si vb' Tvonowe . chom- in Beyerlant .
1321,2 do wrden disiv mere . witen bechant .
1321,3 daz z en Hunin fvre . Chriemh' div kunigin .
1321,4 des frevt sich ir Oeheim . ein Bischof d' hiez Pilgerin .
- 1322,1 In d' stat ze Pazzowe . was er bisschof .
1322,2 die herberge wrden laere . vn- ovch des fvrsten hof .
1322,3 si ilten gegen den gesten . vf in Bayerlant .
1322,4 da d' Bisscof Pilgerin . die schonen Chriemh' vant .
- 1323,1 Sinem ingesinde . was daz niht ze leit .
1323,2 daz si ir volgen sahen . so manige schone meit .
1323,3 da trvot man mit ovgen . der edeln ritter chint .
1323,4 vil riche herberge . gap man den edeln gesten sint .
- 1324,1 Da ze Pledelingen schvf man in gemach .
1324,2 daz volch man allenthalben . zvoz in riten sach .
1324,3 man gab in willechliche . des si bedorften da .
1324,4 si namen z wol mit eren . als tet man sid' and'swa .

- 1325,1 Div frowe mit ir Oeheim . ze Pazzowe reit .
1325,2 ez was den Burgaeren . dar inne niht ze leit .
1325,3 daz dar chomen solde . des fursten swester chint .
1325,4 si wart vil wol enpfangen . von den kovflvten sint .
- 1326,1 Daz si beliben solden . d' Bisscof het es wan .
1326,2 do sprach d' marcgra . "es en mac niht ergan .
1326,3 wir mvzin nid' riten . in d' Hvnin lant .
1326,4 vns wartet vil d' degene . wande ez in allen ist bechant ."
- 1327,1 Disiv maere ovch wiste . div schone Goetelint .
1327,2 si bereite sich mit vlize . gein ir frowen sint .
1327,3 ir het enboten Rvdeger . daz in daz dvhte gvot .
1327,4 daz si d' kuniginne . da mite troste den mvot .
- 1328,1 Daz si ir rite engegene . mit den sinen man .
1328,2 vf zvo d' ense . do daz wart getan .
1328,3 do sah man allenthalben . vil vnmvoze pflegn .
1328,4 durch d' geste liebe . si mvsin rowe sich bewegn .
- 1329,1 Si was d' naechsten nahte . ze Everdingen chomen .
1329,2 gnvoze vz bayerlande . solden si han genom- .
1329,3 den rovp vf d' straze . nach ir gewonheit .
1329,4 so heten si den gesten . erboten eteslichiv leit
- 1330,1 Daz hete wol behvetet . d' edel Rvedeger .
1330,2 er fvorte tvsint ritter . vn- dannoch mer .
1330,3 do was ovch chomen Gotelint . des marcgra wip .
1330,4 mit ir fvor herrenliche . vil maniges chvnen rechen lip .
- 1331,1 Do si vb' die Trvone chomen . bi ense vf daz velt .
1331,2 do sah man vf gespannen . hvetten vn- gezelt .
1331,3 da die geste solden . die nahtselde han .
1331,4 von Rvdegeres frivnden . wart in dienste vil getan .
- 1332,1 Gotelint div schoene . die herberge lie .
1332,2 hind' ir beliben . vf den wegn gie .
1332,3 mit chlingenden zovmen . die moere wol getan .
1332,4 d' antfanch wart vil schoene . liep was iz Rvdegere ir man .
- 1333,1 Di in ze beden siten . chomen vf den wegen .
1333,2 die riten vroliche . d' was vil manic degen .
1333,3 si pflagen ritterschefte . daz sach vil manic meit .
1333,4 ovch was d' helede dienst . den schonen frowen niht ze leit .
- 1334,1 Do zvo den gesten chomen . die Rvdegeres man .
1334,2 vil d' trvonzvne . sach man ze berge gan .

- 1334,3 von den rechen handen . mit ritterlichen siten .
1334,4 da wart wol ze prise . vor den frowen geriten .
- 1335,1 Daz liezen si beliben . do grvzte manic man .
1335,2 vil gvtlich einand' . do fvrten si von dan .
1335,3 die schonen Gotelinde . da si Chriemh' sach .
1335,4 die frowen dienen chunden . die musin liden vngemach .
- 1336,1 Der voget von Bechelaren . zv sime wibe reit .
1336,2 d' edelen marcgrauinne . was daz niht ze leit .
1336,3 daz er so wol gesund' . was vo- Rine chomen .
1336,4 ia was ir vil ir sorgen mit grozen vrevden benom- .
- 1337,1 Do si in het enpfangen . er hiez si vf daz gras .
1337,2 erbeizen mit den frowen . swaz ir da mit ir was .
1337,3 mit dienste was vnmvzich . da vil manic man .
1337,4 d' wart den schonen frowen . mit grozem vlize getan .
- 1338,1 Do sach div kuniginne . hie Gotelinde sten .
1338,2 mit ir ingesinde . si lie niht naher gen .
1338,3 daz pferit mit dem zovme . zvchen si began .
1338,4 si bat sich heben balde . nid' von dem satel dan .
- 1339,1 Den bisscof sach man wisen . siner swester chint .
1339,2 in vn- Ekkewarten . zvo Gotelinde sint .
1339,3 da wart vil michel wichen . an d' selben stvnt .
1339,4 do chuste div ellende . an d' marcgrauinne munt .
- 1340,1 Do sprach vil minnekliche . daz Rvdegeres wip .
1340,2 "nv wol mich liebiv frowe . de ich iweren schonen lip .
1340,3 han in disen landen . mit frevden hie gesehn .
1340,4 mir en chvnde in disen citen . nimmer lieber geschehen ."
- 1341,1 "Nv lon iv got" sprach Chriemh' . "vil edel Gotelint .
1341,2 sol ich gesvnt beliben . vn- Botelunges chint .
1341,3 ez mag iv chomen ze liebe . daz ir mich habt gesehn ."
1341,4 in beiden was unchvnde . daz sid' mvoste geschehn .
- 1342,1 Mit zvhten zvz einand' . si sazen vf den chle .
1342,2 die gerne frowen sahen . den was da niht ze we .
1342,3 ir sveziv ovgenweide . braht in hohen mvot .
1342,4 den wiben sam den mannen . als ez noch vil dicke tvot .
- 1343,1 Man hiez den gesten schenchen . ez was wol mitt' tac .
1343,2 daz edel ingesinde . da niht langer lac .
1343,3 si riten da si fvnden . vil manige hvttten breit .
1343,4 da was den werden gesten . vil groziv wirtschaft bereit .

- 1344,1 Die naht si heten rowe . vnz an den morgen frvo .
1344,2 die von Bechelaren . bereiten sich dar zvo .
1344,3 wie si behalten solden . vil manigen werden gast .
1344,4 wol het geschaffen Rvdeger . daz in vil wenich iht gebrast .
- 1345,1 Div venster an den mvoren . sah man offen stan .
1345,2 div guote Bechelaren . div was vf getan .
1345,3 dar ine riten geste . die man vil gerne sach .
1345,4 den het d' wirt vil edele . schaffen richen gemach .
- 1346,1 Div Rvdegeres tohter . mit ir gesinde gie .
1346,2 da si die kvniginne . vil minneklich enpfie .
1346,3 da bi was ovch ir mvoter . des marcgra . wip .
1346,4 mit liebe wart gegrvezet . vil maniger ivncfrowen lip .
- 1347,1 Si viengen sich bi henden . vn- giengen dan .
1347,2 in einen Palas witen . d' was vil wol getan .
1347,3 da div Tvonowe . vnden hine vloz .
1347,4 si sazen gegen dem lvofte . vn- heten churcewile groz .
- 1348,1 Wes si nv mere pflegen . des en cha- ich niht gesagn .
1348,2 daz in so vbele zogete . daz horte man do chlagen .
1348,3 die Chriemh' rechen . wand ez was in leit .
1348,4 hey waz gyter degene . mit ir vo- Bechelaren reit .
- 1349,1 Vil minneklichen dienst . d' marcgra in bot .
1349,2 do gabt div kuniginne . zwelf povge rot .
1349,3 d' Gotlinde tohter . vn- also gvot gewant .
1349,4 daz si niht bezzers brahte . in daz Etzelen lant .
- 1350,1 Swie ir genom- waere . d' Nibelunge golt .
1350,2 alle die si gesahen . die machte si ir holt .
1350,3 noch mit dem chleinem gvote . daz si da mohte han .
1350,4 des wirtes ingesinde . wart michel gabe getan .
- 1351,1 Da widere bot do ere . div frowe Gotelint .
1351,2 den gessten von dem Rine . so minnekliche sint .
1351,3 daz man do d' fremden . harte wenich vant .
1351,4 si ne trvgen ir gesteine . oder ir vil herlich gewant .
- 1352,1 Do si enbizzen waren . vn- daz si solden dan .
1352,2 von d' hvosfrowen . wart geboten an .
1352,3 getriwelich' dienst . daz Etzelen wip .
1352,4 do wart ovch vil getrvtet . der schonen iuncfrowen lip .
- 1353,1 Si sprach z er kuniginne . "swenne ivch nv dunchet gvot .
1353,2 ich weiz wol daz iz gerne . min lieb' vat' tvot .
1353,3 daz er mich zvoz iv sendet . in d' Hvnin lant ."

- 1353,4 daz si ir getriwe waere . vil wol daz Chriemh' ervant .
- 1354,1 Div ros bereitet waren . fvr Bechelaren chom- .
1354,2 ovch het div kuniginne . vrlovp nv genomen .
1354,3 von Rvdegeres wibe . vn- von d' tohter sin .
1354,4 do schiet ovch sich mit grvoze . vil manic schone magedin .
- 1355,1 Einand' si vil selten . gesahen nach den tagen .
1355,2 vzer Medeliche . vf handen wart getragen .
1355,3 manic goltvaz riche . dar inne braht man win .
1355,4 den gesten vf die straze . vn- bat si willechomen sin .
- 1356,1 Ein wirt was da gesezzen . Astolt was d' nant .
1356,2 d' wiste si die straze . nid' in Osterlant
1356,3 gegen Mvtaren . die Tvonowe Nid' .
1356,4 da wart vil wol gedienet . d' richen kuniginne sid' .
- 1357,1 Der Bisschof minnekliche . von siner Nifteln schiet .
1357,2 daz si den kunic becherte . wie vast er ir daz riet .
1357,3 un- daz si ir ere chovfte . sam Helche het getan .
1357,4 hey waz si grozer eren . sit da z en Hvnin gewan .
- 1358,1 Zvo der Treysem brahte . man die geste dan .
1358,2 ir pflagen vlizzekliche . die Rvdegeres man .
1358,3 vnze daz die Hunin . riten vb' lant .
1358,4 do wart d' chuniginne . vil michel ere bechant .
- 1359,1 Bi d' Treysem hete d' kunic von Hunin lant .
1359,2 eine burch vil riche . div was wol bechant .
1359,3 geheizen Treysenmvore . frov Helche saz da e .
1359,4 vn- pflach so grozer tugende . de iz wetlich nimm' mer erge .
- 1360,1 Ez en taete danne Chriem' . div also chvnde gebn .
1360,2 si mohte nach ir leide . daz liep vil wol gelebn .
1360,3 daz ir iahen ere die Etzelen man .
1360,4 d' si sit grozen vollen bi den helden gewan .
- 1361,1 Div etzelen herschaft . was so wit erchant .
1361,2 daz man z allen citen . in sime hofe vant .
1361,3 die allerbesten rechen . von den ie wart v'nomen .
1361,4 vnd' kristen un- vnder heiden . die waren gein d' brvte chomen .
- 1362,1 Bi im was z allen citen . daz waetlich mer erge .
1362,2 kristenlich' orden . vn- ovch d' heiden e .
1362,3 in swiegetanem lebene . sich ieslich' trvoc .
1362,4 daz schvof des kuniges milte . daz man allen gap genvoch .
- 1363, Auentur wie Chriemh' vn- Ezele brvten in d' stat ze Wienne .

- 1363,1 SI was ze Treysenmvore . vnz an den vierden tac .
1363,2 div molte vof d' straze . die wile nie gelac .
1363,3 si ne stvbe sam iz brunne . allenthalben dan .
1363,4 da riten durch Osterriche . des kunic Ezelen man .
- 1364,1 Do waren ovch dem kunige . div maere nv geseit .
1364,2 des im von gedanchen . swnden siniv leit .
1364,3 wie herre-lichen Chriemh' . da chome durch div lant .
1364,4 er begunde vaste gahen . da er die minneklichen vant .
- 1365,1 Von vil maniger sprache . sah man vf den wegn .
1365,2 vor Ezelen riten . vil manigen chvnen degen .
1365,3 kristen vn- heiden . vil manic witiv schar .
1365,4 da si ir frowen fvnden . si fvren vrolichen dar .
- 1366,1 Uon rvzzen vn- von Chriecken . reit da vil manic man .
1366,2 Polanen vn- Vlachen . den sah man ebene gan .
1366,3 ir pferit vn- ros div gvten . da si mit chreftin riten .
1366,4 swaz si site habeten . d' wart vil wenich iht v'miten .
- 1367,1 Von dem lande vz Chyewen . reit ovch da manic man .
1367,2 vn- die wilden Pescenaere . da wart des vil getan .
1367,3 mit den bogen schiezen . z en vogelen die da flvogen .
1367,4 ir pfile si vil sere . mit chraft vnz an die wende zvogen .
- 1368,1 Ein stat bi Tvonowe . lit in osterlant .
1368,2 div ist geheizen Tvlme . da wart ir sit bechant .
1368,3 vil manic site vremde . den si nie da vor gesach .
1368,4 si enpfiegen da genvge . den leide sit von ir geschach .
- 1369,1 Vor Ezele dem richen . ein gesinde reit .
1369,2 vro in hohem mvote . hobesch vn- ovch gemeit .
1369,3 wol vier vn- zweinzech fvrste- rich un- her .
1369,4 daz si ir frowen sehen . da von ne gerten si niht mer .
- 1370,1 Der herzoge Bamunch . vzer vlachen lant .
1370,2 mit Siben hund't mannen . chom er fvr si gerant .
1370,3 sam die wilden voege . so sah man si varn .
1370,4 do chome d' fvrste Gibeche . mit vil h'lichen scharn .
- 1371,1 Hornboge d' snelle . wol mit tvsint man .
1371,2 kerte von me kunige . gein sin' frowen dan .
1371,3 vil lvte wart geschallet . nach des landes siten .
1371,4 von den Hunin magen . wart ovch da sere gerite- .
- 1372,1 Do chom von Tenemarche . d' chvene Hawart .
1372,2 un- Irinch d' starche . vor valsche wol bewart .
1372,3 vn- Irnfrit von Dvri-gen . ein fverste lobesam .

- 1372,4 die enpfiegen Chriemh' . als ez ir eren wol gezam .
- 1373,1 Mit zwelf hund't mannen . die heten s in ir schar .
1373,2 ovch chom d' herre Bloedelin . mit tusint helden dar .
1373,3 d' Etzelen brvot' . vz d' Hunin lant .
1373,4 d' ilte mit den sinen . da er die kuniginne vant .
- 1374,1 Do chom d' kunic Ezele . vn- ovch herre Dietrich ..
1374,2 mit allen sinen degenen . da was vil lobelich .
1374,3 manic ritter edele . biderb vn- gvot .
1374,4 des wart d' chvniginne . ein teil gesenftet d' mvot .
- 1375,1 Do sprach vo- Bechelaren . d' herre Rvdeger .
1375,2 "frowe ivch wil enpfahen . hie d' kunic her .
1375,3 swen ich iv rate chvssen . daz sol sin getan .
1375,4 ia ne mvgt ir niht geliche . grvzen alle kuniges man ."
- 1376,1 Do hyp man von dem more . die kunigi-ne her .
1376,2 Ezele d' riche . en beite ovch do niht mer .
1376,3 er stvnt von sinem rosse . mit manigem chvnen man .
1376,4 man sah in vroliche . gein Chriemh' gen .
- 1377,1 Zwen fvrsten riche . als vns daz ist geseit .
1377,2 bi d' frowen giengen . vn- habten ir div kleit .
1377,3 do ir d' kunic Ezele . hin begegene gie .
1377,4 da si den fursten edele . mit chusse gvtlich enpfie .
- 1378,1 Vf rihte si ir gebende ir varwe wol getan .
1378,2 div lvhte ir vz em golde . da stvnt vil manic man .
1378,3 die iahen daz frov Helche . niht schoner chunde sin .
1378,4 da bi stvnt vil nahen . des wirtes brvd' Bloedelin .
- 1379,1 Den hiez si chussen Rvedeger . d' marcgra rich .
1379,2 vnt den kunic Gibechen . da stvnt ovch her Dietrich .
1379,3 d' rechen chuste zwelfe . daz Ezelen wip .
1379,4 do enpfie si svs mit grvoze . vil maniges chvnen rechen lip .
- 1380,1 In der selben wile . vn- Ezele bi ir stvont .
1380,2 do gebarten da die tvmben . so noch die lvte tvont .
1380,3 vil manigen pvneyz langen . sah man da geriten .
1380,4 daz taten kristen degene . vn- ovch die heiden nach ir siten .
- 1381,1 Wie rehte hurteklichen . die Dietriches man .
1381,2 die schefte liezen vliegen . mit trvnzvonen dan .
1381,3 vil hohe vb' schilde . von gyter ritter hant .
1381,4 die si da gerne sahen . die wrden schiere bechant .
- 1382,1 Da wart von schefte brechen . vil michel chrach v'nomen .

- 1382,2 da waren von dem lande . die rechen alle chomen .
1382,3 vn- ovch des chuniges geste . vil manic edel man .
1382,4 do gie d' kunic riche . mit d' kuniginne dan .
- 1383,1 Si sahen bi in stende . ein vil herlich gezelt .
1383,2 von hutten was erfvllet . alumbe gar daz velt .
1383,3 da si vnd' solden rvowen . nach ir arebeit .
1383,4 von helden wart gewiset . vil manic waetlichiv meit .
- 1384,1 Mit Chriemh' dannen . da si sit gesaz .
1384,2 vf riche gesidele . d' marcgra daz .
1384,3 hete so geschaffen . daz man ez vant vil gvot .
1384,4 do stvnt dem kunige Ezelen . harte hohe d' mvot .
- 1385,1 Waz si zesamne redeten . daz ist mir vnbechant .
1385,2 wan zwisschen sinen handen . was ir wiziv hant .
1385,3 si gesazen minnekliche . da Rvdegere d' degen .
1385,4 den kunic niht lazen wolde . d' frowen heinliche pflegen .
- 1386,1 Do hiez man lan beliben . den buhvirt vb'al .
1386,2 mit eren wart v'endet . da d' groze schal .
1386,3 do giengen zvo den hutten . die Ezelen man .
1386,4 man gab in herberge . vil witen allenthalben dan .
- 1387,1 Den abent zvo d' nahte . si heten gvot gemach .
1387,2 vnz man den liechten morgen . ab' schinen sach .
1387,3 do was gesatelet Ezelen . vn- allen sinen man .
1387,4 vil maniger chvrcewile . man im z en eren da began .
- 1388,1 Der chunic ez lobeliche . die Hunin schaffen bat .
1388,2 do riten si von Tvlme . ze Wiene zv d' stat .
1388,3 da was vil wol gezieret . vil manig' frowen lip .
1388,4 si enpfingen wol mit eren . des kunic Ezelen wip .
- 1389,1 Mit vil grozem vollen . so was in bereit .
1389,2 swaz si haben solden . vil manic helt gemeit .
1389,3 entrvsten riche saetele . die Ezelen man .
1389,4 sich hvp mit grozen eren . des kuniges hochgeciten an .
- 1390,1 Si ne mohten niht beliben . ze wiene in d' stat .
1390,2 die niht geste waren . Rvdeger die bat .
1390,3 von d' Burege dannen . herbergen in daz lant .
1390,4 ich waen man alle cite . bi frowen Chriemh' vant .
- 1391,1 Den herren Dietrichen . vn- and's manigen degn .
1391,2 si heten sich d' rowe . mit arebeite bewegn .
1391,3 durch daz si den gesten . getrosten wol den mvot .
1391,4 d' kunic mit sinen frivnden . hete churcewile gvot .

- 1392,1 Div hochgecite was gevallen . an einen pfinttach
1392,2 do d' kunic Ezelei . bi Chriemh' lach .
1392,3 in d' stat ze wiene . si waen so manigen man .
1392,4 bi ir ersten vriedel . nie ze dienste gewan .
- 1393,1 Si chvnte sich mit gabe . dem d' si nie gesach .
1393,2 vil maniger dar vnd' . zvo den gesten sprach .
1393,3 "wir wanden daz frov Chriemh' . niht gvotes mohte han .
1393,4 nv ist hie michel wnd' . von ir gabe getan ."
- 1394,1 Div hochgecit do werte . wol sibenzehn tage .
1394,2 ob chunic ie deheiner mit warheit od' nach sage .
1394,3 deheiner grozer gewnne . daz ist vns gar verdeit .
1394,4 alle di da waren . die trvgen iteniwe chleit .
- 1395,1 Si waen in Nid'landen . da vor nie gesaz .
1395,2 mit so manigem rechen . da von gelovbe ich daz .
1395,3 was Sivrit rich des gvotes . daz er doch nie gewan .
1395,4 so manigen rechen edelen . als si z en hunin mohte han .
- 1396,1 Ovch gab ir nie deheiner . zvo sin selbes hochgezit .
1396,2 so manigen richen mantel . lanch . tief . vn- wit .
1396,3 noch so richer chleid' . d' si vil mohten han .
1396,4 so si durch Chriemh' . alle heten hie getan .
- 1397,1 Die chunden un- die geste . die heten einen mvot .
1397,2 daz si da niht sparten . deheiner slahte gvot .
1397,3 swes ieman an si gerte . daz gaben si bereit .
1397,4 des stvnt da vil d' degene . von milte bloz ane chleit .
- 1398,1 Wie si ze Rine saeze . si gedaht an daz .
1398,2 bi ir vil edelem manne . ir ovgen wrden naz .
1398,3 si het es vaste haele . de iz iemen chunde sehn .
1398,4 ir was nach manigem leide . so vil d' eren hie geschehen .
- 1399,1 Swaz iemen tet mit milte . daz was gar ein wint .
1399,2 vnz an Dietrichen . swaz Botelunges chint .
1399,3 im gegeben hete . daz was gar v'swant .
1399,4 ovch tet da michel wnd' . des milten Rvdegeres hant .
- 1400,1 Vzer vngerlande . d' fvrste Bloedelin .
1400,2 d' hiez da machen laere . vil manigiv leitschrin .
1400,3 von Silb' vn- von golde . daz wart gar hin gegeben .
1400,4 man gesach nie kuniges degene . so rehte vroliche lebn .
- 1401,1 Swemmel vn- werbel . die Ezelen spileman .
1401,2 ich waen ir ieslicher . z er hochgecite da gewan .

- 1401,3 wol ze tvsint marchen . oder dannoch baz .
1401,4 da div frowe Chriemh' . bi Ezelen vnd' chronen saz .
- 1402,1 An dem Ahtzehenden morgen . von Wiene si do riten .
1402,2 da wart in ritt'schefte . schilde vil v'sniten .
1402,3 von spern die da fvrten . die rechen an d' hant .
1402,4 svs chome d' kunic Ezele . mit frevden in d' Hunin lant .
- 1403,1 Ze heimburch d' alten . si waren vb' naht .
1403,2 do ne chunde niem- wizzen . wol des volches aht .
1403,3 mit wie getaner chrefte . si riten dvrch daz lant .
1403,4 hey waz man schoner frvwen . in ir heymvete vant .
- 1404,1 Ze Miesenburch d' richen . da schiften si sich an .
1404,2 daz wazzer wart v'dechet . von ross vn- ovch von man .
1404,3 sam ez erde waere . swaz man sin vb'sach .
1404,4 die wegemvede frowen . heten senfte vn- ovch gemach .
- 1405,1 Zesamne was gebunden . manic schif vil gvot .
1405,2 daz in niht schaden chunde . die venden noch div flvot .
1405,3 dar vb' was gespannen . vil manic gvot gezelt .
1405,4 sam ob si noch heten . bediv lant vn- velt .
- 1406,1 Ze Ezelen Buerge . div maere chom- dan .
1406,2 do frevten sich dar inne . wibe vn- man .
1406,3 daz Helchen ingesinde . des e div frowe pflach .
1406,4 gelebte bi Chriemh' . sit manigen froelichen tach .
- 1407,1 Do stvnt in lieb' warte . vil manic edel meit .
1407,2 die von Helchen tode . heten manigiv leit .
1407,3 siben chunige toht' . Chriemh' noch da vant .
1407,4 von den was wol gezieret . allez Ezelen lant .
- 1408,1 Div iuncfrowe Herrat . noch des gesindes pflac .
1408,2 div Helchen swester tohter . an d' vil tugende lac .
1408,3 div gemahle Dietriches . eins richen chuniges chint .
1408,4 div Tohter Naentwines . div hete vil d' eren sint .
- 1409,1 Von d' geste chunfte . so troste sich ir mvot .
1409,2 ovch was dar zv bereitet . vil chreftechlichez gvot .
1409,3 wer chunde iv daz bescheiden . wie sit d' kunic saz .
1409,4 si ne gelebten da z en Hunin . mit deheiner chvniginne baz .
- 1410,1 Do d' wirt mit sime wibe . von dem stade reit .
1410,2 wer ieslichiv waere . daz wart zehant geseit .
1410,3 d' edeln kuniginne . si grvzte s deste baz .
1410,4 hey wie gewaltekliche . si sit an Helchen stat gesaz .

- 1411,1 Mit triwen hoher dienste . wart ir vil bechant .
1411,2 do teilte div frowe Chriemh' . golt vn- ovch gewant .
1411,3 silber un- gesteine . swaz si des vb' Rin .
1411,4 mit ir z en Hvnin brahte . daz mvse gar zerteilet siN .
- 1412,1 Ovch wrden ir mit dienste . sid' vnd'tan .
1412,2 al des chuniges mage . vn- alle sine man .
1412,3 daz nie div frowe Helche . so gewaldechlich gebot .
1412,4 so si nv mvsin dienen . vnz an den Chriemh' tot .
- 1413,1 Do stvnt mit solhen eren . d' hof vn- ovch daz lant .
1413,2 daz man da z allen ziten . die churzewile vant .
1413,3 swar nach ieslichem . daz herce trvch den mvot .
1413,4 durch des kuniges liebe . vn- ovch die kvniginne gvot .
- 1414, Auentur wie d' kunec Ezele vn- div frowe C . nach ir frivnden ze Wormez
sande .
1414,1 IN Also hohen eren . daz ist alwar .
1414,2 si wonten bi dem kunige . vn-z in daz sibende iar .
1414,3 di zit div kuniginne . eines svnes was genesen .
1414,4 des chunde d' chunic Ezele nimm' vrolicher gewesn .
- 1415,1 Si ne wolde niht erwinden . si ne wrbe sint .
1415,2 daz getovfet wrde . daz Ezelen chint .
1415,3 nach christenlichem rehte . Ortliep wart ez genant .
1415,4 si wolden z han ze herren . vber elliv Ezelen lant .
- 1416,1 Swaz ie gvoter tugende . an frovn Helchen lac .
1416,2 des vleiz sich frov Chriemh' . dar nach vil manigen tac .
1416,3 die site si lerte Herrat . div ellende meit .
1416,4 div hete tovgenliche . nach ir frowen groziv leit .
- 1417,1 Die fremden vn- die chunden . die iahen da zehant .
1417,2 daz nie milter frowe . besaeze ein kuniges lant .
1417,3 noch deheiniv tiverr lebte . des iach man ir fvr war .
1417,4 si erwarp ir lop vil grozen . z en Hunin in daz zwelfte iar .
- 1418,1 Si hete nv wol erchvnnen . daz ir niem- wid'stvnt .
1418,2 als iz noch fursten wibe . kuniges rechen tvont .
1418,3 vn- daz si alle cite . zwelf kunige vor ir sach .
1418,4 do gedahte s maniger leide . d' ir da heime gesach .
- 1419,1 Si gedaht ovch manig' eren . von Nibelunge lant .
1419,2 d' si da was gewaltech . vn- die ir Hagenen hant .
1419,3 mit Sivrides tode . hete gar benomen .
1419,4 si gedaht ob im daz imm' . noch ze leide moehte . chomen .
- 1420,1 Si wnschte daz ir mvoter . waere in Hunin lant .

- 1420,2 ir trovmte daz ir Giselh' . gienge an d' hant .
1420,3 bi Ezele dem chunige . si chvst en z aller stvont .
1420,4 vil diche in senftem slafe . sit wart in arebeiten chvnt .
- 1421,1 Si ne chvnde ovch nie v'gezzen . swie wol ir and's was .
1421,2 ir starchen hercenleide . in ir hercen si ez las .
1421,3 mit iamer z allen stvnden . daz man sit wol bevant .
1421,4 do begynde ir ab' salwen . von heizen trahen ir gewant .
- 1422,1 Ez lac ir an dem hercen . spat un- frvo .
1422,2 wie man si ane schulde . brahte d' zvo .
1422,3 daz si mvoise minnen . einen heiden man .
1422,4 daz het ir frivnt Hagene . vn- ovch Gunth' geta- .
- 1423,1 Daz si daz rechen moehte . des wnschte s alle tage .
1423,2 "ich bin nv wol so riche . swem iz ovch missehage .
1423,3 daz ich wol minen vinden . mac gefvegen leit .
1423,4 des waer et ich von Tronege . Hagene gerne bereit .
- 1424,1 Nach den getriwen iamert . diche z herce min .
1424,2 die mir da leide taten . moeht ich bi den gesin .
1424,3 so wrde noch errochen . mines mannes lip .
1424,4 des ich vil chvme erbite ." sprach daz iam'hafte wip .
- 1425,1 Ze liebe si do heten alle s kuniges man .
1425,2 die chriemh' rechen . daz was wol getan .
1425,3 d' kamern d' pflac Ekkewart . da von er frivnt gewan .
1425,4 den Chriemh' willen . mohte niem- v'stan .
- 1426,1 Si gedahte z allen citen . si wold en kunic biten .
1426,2 daz er ir des gunde . mit gvetlichen siten .
1426,3 daz man ir frivnde . braechte . in d' Hunin lant .
1426,4 den argen willen niemen an frown chriemh' ervant .
- 1427,1 Do si eines nahtes . bi dem kunige lac .
1427,2 mit armen vmbevungen . als er vil dicke pflac .
1427,3 die edelen frowen trveten . si was im so d' lip .
1427,4 do gedahte an ir vinde . daz vil herliche wip .
- 1428,1 Si sprach . zv dem kunige . "vil lieber herre min .
1428,2 ich wolde ivch biten gerne . moeht ez mit fvoze sin .
1428,3 daz ich mich sehn liezet . wie ich hete daz v'solt .
1428,4 ob ir mine- frivnden . waeret innechlichen holt ."
- 1429,1 Do sprach d' kunich riche . getriwe was sin mvot .
1429,2 "ich bringe ivch des wol innen . swa lieb vn- gvot .
1429,3 den helden widerfvere . des mvses ich frevde han .
1429,4 wande ich von wibes minne . bezzer frivnde nie gewan ."

- 1430,1 Do sprach div kuniginne . “iv ist daz wol geseit .
1430,2 ich han vil hoher mage . dar vmbe ist mir so leit .
1430,3 daz mich die so selten . rvchent hie gesehn .
1430,4 ich hore min die lvte . niwan fvr ellende iehn .”
- 1431,1 Do sprach d’ kunic Ezele . “vil liebiv frowe min .
1431,2 dvht ez si niht ze verre . so ladet ich vb’ Rin .
1431,3 swelh ir da gerne saehit . her in miniv lant .”
1431,4 div rede ir wol behagete . da si den willen sin ervant .
- 1432,1 Si sprach “welt ir mir triwe . leisten herre min .
1432,2 so svlt ir boten senden . von vns vb’ Rin .
1432,3 so nebvte ich minen magen . des ich da habe mvot .
1432,4 so chvmt vns her ze lande . vil manic edel ritt’ gvot .”
- 1433,1 Er sprach “swenne ir gebietet . so lazet ez geschehn .
1433,2 ir n dorftet iw’ frivnde . nie so gerne sehn .
1433,3 als ich hie gesaehē . d’ edeln Voten chint .
1433,4 mich mvot daz harte sere . daz si vns so lange fremde sint .”
- 1434,1 Er sprach “ob dv ez ratest . vil liebiv frowe min .
1434,2 di mine Videlere . nach den frivnden din .
1434,3 wil ich ze boten senden . in Burgonden lant .”
1434,4 die Ezelen videlaere . hiez man bringe sa zehant .
- 1435,1 Die knappen chomen beide . da ir herre saz .
1435,2 bi d’ kuniginne . d’ kunic in sagte daz .
1435,3 si solden boten werden . in siner frivnde lant .
1435,4 do hiez man in bereiten . harte schiere gvot gewant .
- 1436,1 Vn- ir vartgesellen . vier unt zweinzech man .
1436,2 di mit in varn solden . z en Burgonden dan .
1436,3 in tet d’ chvnich Ezele . chvnt den willen sin .
1436,4 wie si laden solden . Gvnthern mit den frivnden sin .
- 1437,1 Do sprach d’ kunich riche . “ich chvnd iv minen mvot .
1437,2 ich enbivt minen frivnden . lieb vn- allez gvot .
1437,3 daz si gervchen riten . her in miniv leit .
1437,4 ich han so lieb’ geste . harte selten noch bechant .
- 1438,1 Vn- ob si mines willen . wellen iht began .
1438,2 die mine chonemage . daz si des niht lan .
1438,3 si ne chomen mir ze liebe . zvo min’ hochgecit .
1438,4 wande vil d’ minen wenne . an miner frowen magen lit .”
- 1439,1 Do sprach d’ knappen einer . d’ hiez swaemmelin .
1439,2 “benennet vns die hochgecit . wenne sol div sin .

- 1439,3 daz min' frowen frivnde . dar zvo mvgen chomen ."
1439,4 des wart d' kuniginne . ir leides harte vil benom- .
- 1440,1 Do sprach d' kvnic here . "die minen hochgecit .
1440,2 svlt ir ze Rine chvnden . daz ir gewis des sit .
1440,3 ze naechsten Svnewenden . so wil ich si han .
1440,4 die vns mit triwen minnen . daz si die reise niht en lan ."
- 1441,1 "Wir tvon swaz ir gebietet ." sprach do Waerbelin .
1441,2 in ir kemenaten bat si div kunigin .
1441,3 bringen tovgenlichen . da si die boten sprach .
1441,4 da von sit manigem degene . harte leide geschach .
- 1442,1 Si sprach z en boten beiden . "ir dienet michel gvot .
1442,2 ob ir minen willen . tovgenlichen tvot .
1442,3 so sagt swaz ich enbiete . heim in vnser lant .
1442,4 ich mache ivch gvtes riche . vn- gibe iv herlich gewant .
- 1443,1 Swaz ir d' minen frivnde . imm' mvget gesehn .
1443,2 ze Wormze bi dem Rine . den svlt ir niht v'iehn .
1443,3 daz ir noch ie gesaehet . betrvebet minen mvot .
1443,4 vn- saget minen dienst . den heleden chven . vn- gvot .
- 1444,1 Bitet daz si leisten . daz in d' kunic enbot .
1444,2 vn- mich da mite scheiden . von aller miner not .
1444,3 die Hvnen mvgen waenen . de ich ane frivnde si .
1444,4 ob ich ein ritter hieze . ich waer in eteswenne bi .
- 1445,1 Ir saget ovch Gernote . dem lieben brvot' min .
1445,2 daz im z er werlde niemen . hold' mvege sin .
1445,3 vn- bitte in daz er fvere . mit im in dizze lant .
1445,4 die vnser besten frivnde . de iz vns z en eren si gewant .
- 1446,1 Vn- sagt ovch Giselhere . er denche wol dar an .
1446,2 daz er von minen schulden . nie leides niht gewan .
1446,3 des sehen in vil gerne . hie div ovgen min .
1446,4 daz wolde ich imm' mere . hin z im diende sin .
- 1447,1 Nv sagt ovch min' mvot' . die ere die ich han .
1447,2 vn- ob von Tronege Hagene . welle dort bestan .
1447,3 wer si danne solde . wissen durch div lant .
1447,4 dem sint die wege von kinde . her z en Hvnin wol bekant ."
- 1448,1 Die boten niene wessen . wa vo- daz was getan .
1448,2 daz Hagene d' chvene . solde niht bestan .
1448,3 hind' in Rine . daz wart in sid' leit .
1448,4 mit im was manigem degene . z em grimmem tode wid'seit .

- 1449,1 Boteschaft vn- brieve . daz was nv gegeben .
 1449,2 si fvren gvotes riche . vn- mohten schone lebn .
 1449,3 vrlovp gab in Ezele . vn- ovch des kuniges wip .
 1449,4 in was mit rich' waete . vil wol gezieret d' lip .
- 2294,1 DO Hort man allenthalben . iamer also groz .
 2294,2 daz Palas vn- Tvrne . von dem wofe erdoz .
 2294,3 do hort ez ovch von Berne . ein Dietriches man .
 2294,4 dvrch disiv starchen maere . wie bald er gahen began .
- 2295,1 Do sprach er zvo dem fvrsten . "hort min her Dietrich .
 2295,2 swaz ich her gelebt han . so reht vnmvgelich .
 2295,3 gehort ich klage nie mere . als ich nv han v'nomen .
 2295,4 ich waen d' kunic Ezele . ist selbe zv dem schaden chomen .
- 2296,1 Wie moehten s and's alle . haben solhe not .
 2296,2 d' chvnic od' Chriemh' . ir einez daz ist tot .
 2296,3 von den chunen gesten . dvrch ir nit gelegen .
 2296,4 ez weinet harte sere . vil manic vzerwelter degen ."
- 2297,1 Do sprach d' helt von Berne . "mine lieben man .
 2297,2 nv ne gahet niht ze sere . swaz hie hant getan .
 2297,3 die ellenden rechen . des get in michel not .
 2297,4 vn- lat si des geniezen . daz ich in minen vride bot ."
- 2298,1 Do sprach d' chvne Wolfhart . "ich wil dar gan .
 2298,2 vn- wil d' maere vragen . waz si haben getan .
 2298,3 vn- wil z iv sagen denne . vil lieber herre min .
 2298,4 als ich ez rehte ervinde . waz div rede mvege sin ."
- 2299,1 Do sprach d' h're Dietrich . "swa man zornes sich v'siht .
 2299,2 ob vngefvgiv vrage . denne da gesiht .
 2299,3 daz betrvebet rechen . vil lihte danne ir mvot .
 2299,4 ia ne wil ich niht Wolfhart . daz ir die vrage da z in tvot ."
- 2300,1 Do hiez er Helpfrichen . vil balde dar gan .
 2300,2 vn- bat in daz ervinden . an Ezelen man .
 2300,3 oder an den gesten selben . waz waere da geschehn .
 2300,4 do ne het er nie von lvten . so grozer iamer mer gesehen .
- 2301,1 Der bote vragte balde . "waz ist hie getan ."
 2301,2 do seit man im div maere . "da ist vil gar zergan .
 2301,3 swaz wir frevden heten . in d' Hvnen lant .
 2301,4 hie lit erslagen Rvdeger . von d' Bvrgonden hant .
- 2302,1 Die mit im dar in chom- . d' ist einer niht genesen ."
 2302,2 do ne chunde Helpfriche . leid' nimm' wesn .
 2302,3 ia ne sagt er siniv maere . so reht vngerne nie .

- 2302,4 d' bote do hin wid'e . vil sere weinende gie .
- 2303,1 "Waz habt ir vns erfunden ." sprach do Dietrich .
2303,2 "wie weinet ir so sere . degen Helffrich ."
2303,3 do sprach d' chvne reche . "ich mac wol balde chlagen .
2303,4 den gyten Rvdegere . hat vns her Gernot erslagen ."
- 2304,1 Do sprach d' helt von Berne . "daz en sol niht wellen got .
2304,2 daz waer ein starchiv rache . vn- ovch des tivfels spot .
2304,3 wa mite hete Rvdeg' . an in daz v'scholt .
2304,4 ia ist mir daz wol chvende . er ist den Bvrgonden holt ."
- 2305,1 Do sprach d' chvene Wolfhart . "vn- heten si z getan .
2305,2 so solt ez in allen . an ir lebn gan .
2305,3 ob wir z in v'trvgen . des waeren wir geschant .
2305,4 ia hat vns vil gedienet . des gyten Rvdeg's hant ."
- 2306,1 Der vogt der Amelunge . bat iz ervarn baz .
2306,2 vil harte seneliche . er in venster saz .
2306,3 do hiez er Hildebrande . zvo den gesten dan .
2306,4 daz er an in erfvnde . waz da waere getan .
- 2307,1 Der stvrmechvne reche . meist' Hildebrant .
2307,2 wed' schilt noch wafen . trvg er an der hant .
2307,3 er wolde in sinen zvhten . zv den gesten gan .
2307,4 von siner swester chinde . wart im ein strafen getan .
- 2308,1 Do sprach d' grimme Wolfhart . "welt ir dar blozer gan .
2308,2 so ne mag ez ane ein schelten . nimm' wol gestan .
2308,3 so mvzet ir lasterliche . tvon die wid'vart .
2308,4 ob ir dar chomet gewafent . daz eteslicher wol bewart ."
- 2309,1 Do garte sich d' wise . durch des tvmben rat .
2309,2 e iz erfunde Hildebrant . do waren in ir wat .
2309,3 alle Dietriches rechen . vn- trvgen swert en hant .
2309,4 dem helde was iz leide . vil gerne het er z erwant .
- 2310,1 Er vragte war si wolden . "wir wellen mit iv dar .
2310,2 waz ob von Tronege Hagene . dest wirs getar .
2310,3 gein iv mit spotte sprechen . des er chan wol gepflegen ."
2310,4 do er die rede gehorte . da von gestatt es in d' degen .
- 2311,1 Do sach d' chvne Volker . wol gewafent gan .
2311,2 die rechen vo- Berne . die Dietriches man .
2311,3 begvrtet mit den swerten . ir schilde vor der hant .
2311,4 er sagt ez sinen herren . vzer Bvrgonden lant .
- 2312,1 Do sprach der Videlaere . "ich sihe dort her gan .

- 2312,2 so rehte vientliche . die Dietriches man .
2312,3 gewafent vnd' helme . si wellent vns bestan .
2312,4 mich nimt des michel wnder . waz wir den rechen haben getan ."
- 2313,1 In den selben ziten . chom ovch Hildebrant .
2313,2 do sazt er fvr die fvze . sinen schildes rant .
2313,3 er begvnde vragen . die Gunth's man .
2313,4 "o we ir gvten degene . waz het iv Rvdeger getan .
- 2314,1 Mich hat min herre Dietrich . her zvz iv gesant .
2314,2 ob erslagen hete . iw' deheines hant .
2314,3 den edeln marcgra . als vns ist geseit .
2314,4 wir en chvnden vb'winden . niht div groezlichen leit ."
- 2315,1 Do sprach d' grimme Hagene . "daz maere ist vngelogen .
2315,2 wie wol ich iv des gvnde . het ivch d' bot betrogen .
2315,3 dvrch Rvdegeres liebe . daz lebte noch sin lip .
2315,4 den imm' mvgen weinen . bediv man vn- ovch div wip ."
- 2316,1 Do si daz rehte erhorten . daz er waere tot .
2316,2 do chlagten in die degene . ir triwe in daz gebot .
2316,3 den Dietriches mannen . sah man traehene gan .
2316,4 vb' baerte vn- vb' chinne . in was vil leide getan .
- 2317,1 Der herzoge vzer Berne . Sigestap do sprach .
2317,2 "nv hat gar ein ende . genom- d' gemacht .
2317,3 den vns ie fvogte Rvdeger . nach vnser leide tagen .
2317,4 frevde ellend' diete . lit von iv degenen erslagen ."
- 2318,1 Do sprach von Amelvngen . d' degen Wolfwin .
2318,2 "vn- ob ich hivte saehe . tot den vater min .
2318,3 mir en wrde nimm' leid' . denne vmbe sinen lip .
2318,4 o we wer sol nv troesten . des gvten marcgraven wip ."
- 2319,1 Do sprach in zornes mvote . d' chvene Wolfhart .
2319,2 "wer wiset nv die rechen . so manige hervart .
2319,3 also d' marcgra . vil diche hat getan .
2319,4 o we vil edel Rvdeg' . de ich dinen tot gelebt han ."
- 2320,1 Wolfprant vn- Helpfrich . vn- Helmnot .
2320,2 mit allen ir frivnden . si weinten sinen tot .
2320,3 vor svften mohte vragen . niht mer Hildebrant .
2320,4 er sprach "nv tvot ir degene . dar nach min herre hat gesant .
- 2321,1 Gebt vns Rvdegeren . so toten vz dem Sal .
2321,2 an dem gar mit iamer . lit vnser vrevden val .
2321,3 vn- lat vns an im dienen . daz er ie hat began .
2321,4 an vns vil grozer triwen . vn- ovch an manigem vremen man .

- 2322,1 Wir sin ovch ellende . als Rvdeg' d' degen .
2322,2 wes lazet ir vns biten . lat in vns after wegen .
2322,3 tragen daz wir nach tode . lonen noch dem man .
2322,4 wir heten z pillicher . bi sime lebene getan ."
- 2323,1 Do sprach d' kunec Gvnth' . "nie dienst wart so gvot .
2323,2 den ein frivnt frivnde . so nach tode tvot .
2323,3 daz heiz ich staete triwe . swer die chan began .
2323,4 ir lonet im von schulden . wand er iv liebe hat getan ."
- 2324,1 "Wie lange svln wir vlegen ." sprach Wulfhart d' degen .
2324,2 sit vnser trost d' beste . ist von iv tot belegen .
2324,3 vn- wir sin leid' mere . mvgen niht haben .
2324,4 lat in vns tragen hinnen . da wir den rechen begraben .
- 2325,1 Des antwrt Volker . "niem- in iv git .
2325,2 nemt in in dem hvse . da d' degen lit .
2325,3 mit sinen tiefen wunden . gefallen in daz blvot .
2325,4 so ist ez ein voller dienst . den ir hie Rvdegere tvot ."
- 2326,1 Do sprach der chvne Wulfhart . "lat sin her spileman .
2326,2 ir n dvrft vns niht reizen . ir habt vns leit getan .
2326,3 toerst ich vor mime herren . so chomt ir s in not .
2326,4 des mvzen wir ez lazen . wan er vns strit mit iv v'bot ."
- 2327,1 Do sprach d' Videlaere . "d' vorht ist gar ze vil .
2327,2 swaz man im v'bivtet . d' z allez lazen wil .
2327,3 daz en chan ich niht geheizten . rehten heldes mvot ."
2327,4 div rede dvhte Hagenen . von sime- hergesellen gvot .
- 2328,1 "Welt ir den spot niht lazen ." sprach ab' Wulfhart .
2328,2 "ich entriht iv liht die seiten . swenne ir die wid'vart .
2328,3 ritet gegen Rine . daz ir z wol mvgt gesagen .
2328,4 iw' vb'mveten . mag ich langer niht v'tragen ."
- 2329,1 Do sprach d' videlaere . "swenn ir die seiten min .
2329,2 v'irret gvoter done . d' iw' helmes schin .
2329,3 mac wol trvebe werden . von der min' hant .
2329,4 swie ich halte geriten . in d' Burgonden lant ."
- 2330,1 Do wold er zvozt im springen . wan daz in niht en lie .
2330,2 Hildebrant sin oehaim . in vaste z im gevie .
2330,3 "ich waen dv woldest woten . dvrch dinen tvmben zorn .
2330,4 mines herren hvlt . wir hete- imm' mer v'lorn ."
- 2331,1 "Lat ab den lewen meister . er ist so grimme gemvot .
2331,2 chvmt er mir z en handen ." sprach Volker d' helt gvot .

- 2331,3 "het er die werlde alle . mit siner hant erslagen .
2331,4 ich slah in daz er z wid'spel . nimm' mere darf gesagen ."
- 2332,1 Des wart vil harte erzvnet . d' Bernaere mvot .
2332,2 den schilt gezvchte Wolfhart . ein sneller degen gvot .
2332,3 alsam ein lewe wild' . lief er vor in dan .
2332,4 im wart ein gaehez volgen . von sinen frivnden getan .
- 2333,1 Swie witer sprvnge er pflaege . fvr des Sales want .
2333,2 doch ergahet in vor d' stiegen . d' alde Hildebrant .
2333,3 er wolde in vor im lazen . niht chomen in den strit .
2333,4 si fvnden daz si svochten . an den ellenden sit .
- 2334,1 Do gespranch zvo Hagene . maist' Hildebrant .
2334,2 div swert man hort erchlingen . an ir beid' hant .
2334,3 si waren harte erzvnet . vil wol erchos man z sint .
2334,4 von ir beid' wafen . gie d' vivrrot' wint .
- 2335,1 Di wrden do gescheiden . in des strites not .
2335,2 daz taten die von Berne . als in ir chraft gebot .
2335,3 zehant do wande Hildebrant . von Hagene balde dan .
2335,4 do lief d' starche Wolfhart . den chvnen Volkeren an .
- 2336,1 Er slvoc den Videlaere . vf den helm gvot .
2336,2 daz des swertes ecke . vnz an die spangen wot .
2336,3 daz v'galt mit ellen . d' chvne spileman .
2336,4 do slvog er Wolfharte- . daz er strvchen began .
- 2337,1 Fivr vz den ringen . des hiwen si genvoc .
2337,2 haz ir ieslich' dem andern vaste trvoc .
2337,3 do schiet do von Berne . der degen Wlfwin .
2337,4 ob er ein helt niht waere . des en chunde niht gesin .
- 2338,1 Gvnther d' vil chvne . mit williger hant .
2338,2 enpfie die helde maere . von Amelunge lant .
2338,3 Giselh' d' starche . div liechten helm vaz .
2338,4 d' frvmt er da vil manigez . von blvote rot vn- naz .
- 2339,1 Danchwart Hagen- brvd' . was ein grimmech man .
2339,2 swaz er da vor hete . in strite getan .
2339,3 den Ezeln rechen . daz was gar ein wint .
2339,4 alrest vaht tobeliche . des kvnen Adrianes kint .
- 2340,1 Gerbart . vn- Wichart . helpfrich vn- Rischart .
2340,2 die heten in manigen stvrmen . vil selten sih gespart .
2340,3 des brahten si wol innen . die Gunth's man .
2340,4 do sach man Wolfpranden . in stvrme herliche gan .

- 2341,1 Da streit er als er wote . d' alde Hildebrant .
2341,2 vil manic kvner reche . vor Wolfhartes hant .
2341,3 mit tode mvse vallen . von sw'ten in daz blvot .
2341,4 svs rachen Rvdeg'e . die rechen kvne vn- gvot .
- 2342,1 Sigestap von Berne . als im sin ellen riet .
2342,2 hey waz er in dem sturme . d' herten helm schriet .
2342,3 den sinen vianden . Dietriches swest' svon .
2342,4 d' chvnde in dem stvrme bezzers nimm' niht getvon .
- 2343,1 Volker d' vil starche . do er daz ersach .
2343,2 daz Sigestap d' chvene . den blvtigen bach .
2343,3 hiw vz h'ten ringen . daz was dem degene zorn .
2343,4 do sprang er im begegene . do hete Sigestap v'lorn .
- 2344,1 Von dem videlaere . vil schiere alda daz lebn .
2344,2 er begunde in siner chunste . alsolhen teil da gebn .
2344,3 daz er von sime swerte . mvse ligen tot .
2344,4 daz rach der alde Hildebrant . als im sin ellen daz gebot .
- 2345,1 "O we vil liebes herren ." sprach meister Hildebrant .
2345,2 "d' hie lit erstorben . von Volkeres hant .
2345,3 nv ne sol d' videlaere . langer niht genesen ."
2345,4 zorn d' Hildebrandes . chunde grimmer niht gewesen .
- 2346,1 Do slvg er Volkere . daz im div helmbant .
2346,2 stvben allenthalben . zvo des Sales want .
2346,3 von helme vn- ovch von schilde . dem chvnen spileman .
2346,4 da von d' videlaere . do den ende da gewan .
- 2347,1 Do drvngen zvo dem strite . die Dietriches man .
2347,2 si slvgen daz die ringe . vil hohe waeten dan .
2347,3 vn- daz man ort d' swerte . in me gewelbe stechen sach .
2347,4 si hiwen vz den helmen . den heize vliezende- bach .
- 2348,1 Do sach von Tronege Hagene . Volkeren tot .
2348,2 daz was z er hochgecite . sin allermeistiv not .
2348,3 die er da hete gewnnen . an magen vn- an man .
2348,4 o we wie grimme Hagene . den helt rechen began .
- 2349,1 "Nv ne sol es niht geniezen . d' alde Hildebrant .
2349,2 min helfe lit erslagene . hie von des heldes hant .
2349,3 d' beste hergeselle . den ie man gewan ."
2349,4 den schilt den rvcht er hoher . do gie er howende dan .
- 2350,1 Helpfrich d' vil starche . Danchwarten slvoc .
2350,2 Gvnth' vn- Giselh' . den was ez leit genvoc .
2350,3 do si in sahen vallen . in d' starchen not .

- 2350,4 er het wol v'golten . mit sinen handen sinen tot .
- 2351,1 Swie vil von manigen landen . gesamnet waere dar .
2351,2 vil fvirsten chreftekliche . gegen ir chleinen schar .
2351,3 waeren die kristen lvte . wid' si niht gewesen .
2351,4 si waeren mit ir ellen . vor allen heiden wol genesen .
- 2352,1 Die wile gie do Wolfhart . beide wid' vn- dan .
2352,2 allez howende . die Gvnth's man .
2352,3 er was die dritten chere . den Palas z ende chom- .
2352,4 ia het er den chunigen . so vil d' rechen da genomen .
- 2353,1 Do rief d' starche Giselher . Wolfharten an .
2353,2 "o vve daz ich so grimmen . vient ie gewan .
2353,3 edel ritte chvene . nv wendet gegen mir ." .
2353,4 si chom- zv einand' . sit mit ellenthaft' gir .
- 2354,1 Wolfhart gein Giselhere . chert in den strit .
2354,2 do slvg ir ietwed'e . vil manige wnde- wit .
2354,3 so rehte chreftechliche . er zvo dem kunige dranch .
2354,4 daz im daz blvot von fvzen . al vb' daz hovbet sin gespranch .
- 2355,1 Mit grimmen slegen swinden . d' edeln Vten chint .
2355,2 enpfie vil pitt'liche . den chvenen rechen sint .
2355,3 swie chvne wolfhart waere . er mohte niht genesen .
2355,4 vor dem ivngen kvnige . niem- dorfte chvner wesen .
- 2356,1 Do slvg er Wolfharte . durch eine prvnne gvot .
2356,2 daz im von d' wnden . vil sere vloz daz blvot .
2356,3 er wnte zvo dem tode . den Dietriches man .
2356,4 ez en het an einen rechen . and' niemen getan .
- 2357,1 Also d' chvne Wolfhart . d' wnden enpfant .
2357,2 den schilt liez er do vallen . hoh' an d' hant .
2357,3 hvb er daz starchez wafen . daz was scharpf genvoc .
2357,4 dvrch helm vn- dvrch ringe . d' helt do Giselh'n slvoc .
- 2358,1 Si heten beide einand' . den grimmen tot getan .
2358,2 do ne lebt ovch nv niht mere . d' Dietriches man .
2358,3 wan Hildebrant aleine . do er den neven vallen sach .
2358,4 im waen vor sime tode . so rehte leide nie geschach .
- 2359,1 Ovch warn gar gevallen . Gunth's degene .
2359,2 niwan si einen zwene . er vn- Hagene .
2359,3 si stvnden in dem blvot . tief unz an div knie .
2359,4 Hildebrant harte balde . hin vb' sinen neven gie .
- 2360,1 Er besloz in mit armen . vn- wolde in tragen dan .

- 2360,2 mit im vz em hvose . er mvse in ligen lan .
2360,3 er was ein teil ze swaere . wid' in daz blvot .
2360,4 enpfel er im vz handen . do blicht vf d' degen gvot .
- 2361,1 Do sprach d' totwnde . "vil lieber oeheim min .
2361,2 ir n mvget an disen ziten . mir niht frvom gesin .
2361,3 nv hvtet ivch vor Hagene . ia dvnchet ez mich gvot .
2361,4 er treit in sime hercen . einen grimmigen mvot .
- 2362,1 Unde ob mich mine mage . nach tode wellen chlagen .
2362,2 den naechsten vn- den besten . den svlt ir daz sagn .
2362,3 daz si nach mir niht weinen . daz ist ane not .
2362,4 vor eines kuniges handen . lige ich hie herlichen tot .
- 2363,1 Ich han ovch so v'golten . hier inne minen lip .
2363,2 daz ez wol mvgen beweinen . d' gyten ritter wip .
2363,3 ob ivch des iemen vrage . so mvget ir balde sagen .
2363,4 vor min eines handen . ir lit wol hund't erslagen ."
- 2364,1 Do gedaht ovch Hagene . an den spileman .
2364,2 dem d' alde Hildebrant . sin lebn an gewan .
2364,3 do sprach er zv dem kvnige . "ir geltet miniv leit .
2364,4 ir habt vns hinne erbvnnen . vil maniges rechen gemeit ."
- 2365,1 Er slvog vf Hildebranden . daz man wol v'nam .
2365,2 Balmvngen diezen . daz Sivride nam .
2365,3 Hagene d' chune . da er den rechen slvoc .
2365,4 do wid'stvnt im Hildebrant . d' im vil wenic iht v'trvoc .
- 2366,1 Der wolfhartes oeheim . slvog ein wafen breit .
2366,2 vf Hagenen von Tronege . daz ovch vil sere sneit .
2366,3 do ne chund ' niht v'wnden . den Gvnth's man .
2366,4 do slvog ab' in Hagene . dvrch eine prvnne wol getan .
- 2367,1 Also meister Hildebrant . d' wnden enpfant .
2367,2 do vorht er schaden mere . von d' Hagenen hant .
2367,3 den schilt warf er vb' rvcke . d' Dietriches man .
2367,4 mit d' starchen wnden . d' helt vil chvome danne entran .
- 2368,1 Dar inne was niem- lebnde . als ich gesaget han .
2368,2 niwan die einen zwene . Gunth' vn- ovch sin man .
2368,3 mit blvte gie bervnnen . d' alde Hildebrant .
2368,4 er brahte leidiv maere . da er sinen herren vant .
- 2369,1 Do sah er trvrechliche . sizzen hie den man .
2369,2 leides michel mere . d' fvrste do gewan .
2369,3 als er Hildebranden . ersach von blvte rot .
2369,4 do vragt er in der maere . als im div sorge gebot .

- 2370,1 “Wan sagt ir mir meister . wie sit ir so naz .
2370,2 worden von dem blvotē . od’ wer tet iv daz .
2370,3 ich wen ir mit den gesten . z em hvse habt gestriten .
2370,4 ich v’bot ez iv so sere . do waer ez pillich v’miten .”
- 2371,1 “Swie vbel disiv maere . mir sten ze sagene .”
2371,2 er sprach “dise wnden . slvoc mir Hagene .
2371,3 do ich vz dem hvse wolde wenden .
2371,4 wie chvom ich ih mit dem lebene . dem selben valande entran .”
- 2372,1 Do sprach d’ Bernaere . “vil reht ist iv geschehn .
2372,2 do ir mich frivntschefte . den helden hortet iehn .
2372,3 daz ir den vride brachet . den ich in het gegeben .
2372,4 hete ih s niht imm’ schande . ir soldet vliessen daz leben .”
- 2373,1 “Nv ne zvrnet niht so sere . min herre Dietrich .
2373,2 an mir vn- minen frivnden . d’ schade ist gremlich .
2373,3 wir wolden Rvdegeren . getragen haben dan .
2373,4 des en wolden vns niht gvnnen . des kvnec Gunth’s man .”
- 2374,1 “So we mir dirre leide . ist Rvdeg’ doch tot .
2374,2 daz mvz mir sin ein iam’ vor aller miner not .
2374,3 Gotelint div edele . ist min’ basen chint .
2374,4 ach we d’ armen weisen . die da ze Bechelaren sint .”
- 2375,1 Riwen vn- ovch leides . mant in do sin tot .
2375,2 er begvnde stanche weinen . des gie dem helede not .
2375,3 “o we getriwer helfe . d’ ich v’lorn han .
2375,4 ia ne vb’winde ich nimmer . des kunic Ezeln man .”
- 2376,1 Er sprach ze Hildebrande . “mvget ir mir doch sagen .
2376,2 wer d’ degen waere . d’ in da hat erslagen .”
2376,3 er sprach “daz tet mit chreften . d’ stanche Gernot .
2376,4 vor Rvdegers handen . mvos vvch d’ degn ligen tot .”
- 2377,1 ER sprach “meister Hildebrant . nv saget minen man .
2377,2 daz si sich balde wafen . ia wil ich dar gan .
2377,3 vn- heizet mir gewinnen . min liehtez wichgewant .
2377,4 ich wil selbe vragē . die helede vz Burgonden lant .”
- 2378,1 Do sprach meister Hildebrant . “wer sol zvoz iv gen .
2378,2 swaz ir habt d’ lebenden . die seht ir bi iv sten .
2378,3 daz bin ich alterseine . die and’n die sint tot .”
2378,4 do erschract er dirre maere . des gie dem rechen groziv not .
- 2379,1 Wand’ leit so grozez . z er werlde nie gewan .
2379,2 er sprach “unt sint erstorben . alle mine man .

- 2379,3 so hat min got v'gezzen . ich was ein kunic rich .
2379,4 nv mag ich wol heizen . der vil arme Dietrich ."
- 2380,1 "Wie chund ez sich gefvgen ." sprach ab' Dietrich .
2380,2 "daz si alle sint erstorben . die helde lobelich .
2380,3 von den stritmvdn . die doch heten not .
2380,4 wan dvrch min vngelvcke . in waere vremde noch d' tot .
- 2381,1 O we vil lieb' Wolfhart . sol ich dich han v'lorn .
2381,2 so mac mich balde riwen . daz ich ie wart geborn .
2381,3 Sigestap vn- Wlfwin . vn- ovch Wolfprant .
2381,4 wer sol mir danne helfen . in d' Amelvnge lant .
- 2382,1 Helpfrich d' vil chvene . vn- ist mir d' erslagen .
2382,2 Gerbart vn- Wichart . wie solde ich die v'klagen .
2382,3 daz ist an minen frevden . mir d' leste tac .
2382,4 o we daz vor leide . niem- sterben ne mac ."
- 2383, Auentur wie d' h're Dietrich Gunth'n vn- Hagen- betwanch .
2383,1 DO svchte d' h're Dietrich selbe sin gewant .
2383,2 do half daz er sich wafent . maist' Hildebrant
2383,3 do chlaget also sere . d' chreftige man .
2383,4 daz im daz hvs erdiezen . gein siner stimme began .
- 2384,1 Der helt gewan do wid'e . rehten mannes mvot .
2384,2 in grimme wart gewafent . do d' degen gvot .
2384,3 einen schiltten vil vesten . den nam er an die hant .
2384,4 nach schaden in do troste . d' vil chune Hildebrant .
- 2385,1 Do sprach von Tronege Hagene . "ich sihe dort her gan .
2385,2 den herren Dietrichen . d' wil vns bestan .
2385,3 nach sinne starchen leide . daz im ist hie geschehn .
2385,4 man sol daz hivte chiesen . wem man des besten mvge iehn .
- 2386,1 Ia ne dvnchet sich von Berne . d' herre Dietrich .
2386,2 nie so starch des libes . vn- ovch so gremelich .
2386,3 vn- wil er z an vns rechen . daz im ist getan ."
2386,4 also reite Hagene . "ich tarr in rehte wol bestan ."
- 2387,1 Die rede erhorte Dietrich . vn- Hildebrant .
2387,2 er gie da er die rechen . beide stende vant .
2387,3 vzen vor dem hvse . geleinet an den Sal .
2387,4 sinen schilt den gyten . den sazte Dietrich ze tal .
- 2388,1 In leitlichen sorgen . sprach do Dietrich .
2388,2 "wie habt ir so geworben . Gunth' ein chunic rich .
2388,3 ich ellender reche . waz ist an mir getan .
2388,4 alles mines trostes . des bin ich eine bestan .

- 2389,1 Ivch en dvhte niht d' volle . an d' vil grozen not .
2389,2 do ir vns Rvdegeren . den rechen slvget tot .
2389,3 nv habt ir mir erbunnen . aller miner man .
2389,4 ia het ich iv degenen . solher leide niht getan .
- 2390,1 Gedenchet an ivch selben . vn- an iw' leit .
2390,2 tot d' iw' frivnde . vn- ovch div arebeit .
2390,3 ob ez iv gvten degenen . beswaeret iht den mvot .
2390,4 o we wie rehte vnsanfte . mir tot d' Rvdegers tot .
- 2391,1 Ez gesaech in d' werlde . nie manne leid' mer .
2391,2 ir gedahtet vbele . an min vn- an iw' ser .
2391,3 swaz ich frevden hete . div lit von iv erslagen .
2391,4 ia ne chan ich nimm' mere . die mine mage v'chlagen ."
- 2392,1 "Ia ne sin wir niht so schuldich ." sprach do Hagene .
2392,2 "ez chomen her z em hvse . die iw'n degene .
2392,3 ze vlize wol gewafent . mit ir schar so breit .
2392,4 mich dvnchet wie iv div maere . niht ze rehte sin geseit ."
- 2393,1 "Waz sol ich anders gelovben . mir sagt ez Hildebrant .
2393,2 do mine rechen gerten . von Amelunge lant .
2393,3 daz ir in Rvdegere . gaebet vz dem Sal .
2393,4 do tat ir niwan spottens . die chvnen helde her ze tal ."
- 2394,1 Do sprach d' kunec Von Rine . "si iahen wolden tragen .
2394,2 Rvedegeren hinnen . den hiez ich in v'sagen .
2394,3 Ezeln ze leide . vn- niht den dinen ma- .
2394,4 vnze daz do Wolfhart . dar vmbe schelten began ."
- 2395,1 Do sprach d' helt von Berne . "ez mvese et also sin .
2395,2 Gunth' kunec edele . dvrch die zvhte din .
2395,3 so ergezzet mich d' leide . die mir sint getan .
2395,4 vn- svn ez ritter chuene . so wil ich gar die schulde lan .
- 2396,1 Ergip dich mir ze Gisel . dv vn- ovch din man .
2396,2 so wil ich ivch behvten . so ich beste chan .
2396,3 daz iv hie z en Hvnen niemen niht en tvot .
2396,4 ir svlt an mir niht vinden . niwan triwe vn- gvot ."
- 2397,1 "Nv ne welle got von himele ." sprach do Hagene .
2397,2 "daz sich dir ergeben . zwen degene .
2397,3 die dv so waerliche . sihest gewafent stan .
2397,4 daz hiez ein michel schande . vn- waer ovch vbele getan ."
- 2398,1 "Ir n svlt ez niht v'sprechen ." sprach ab' Dietrich .
2398,2 "Gunth' vn- Hagene . ia habt ir beide mich .

- 2398,3 so sere beswaeret . min herce vn- ovch den mvot .
2398,4 welt ir mich ergezzen . daz ir z vil pillichen tvot .
- 2399,1 Ich gib s iv mine triwe . vn- giht es iv min hant .
2399,2 daz ich mit iv rite . heim in iw' lant .
2399,3 ich beleite iv nach den eren . od' ich gelige tot .
2399,4 ich wil dvrch ivch v'chiesen . d' minen grozlichen not ."
- 2400,1 "Nv ne gewaehent sin niht mere ." sprach ab' Hagene .
2400,2 "von vns en zimt daz maere niht ze sagene .
2400,3 daz sich iw' ergaeben . zwene also chvne man .
2400,4 nv siht ma- niem- maere . bi iv wan Hildebrande stan ."
- 2401,1 Des antwrt Hildebrant . "ivch mohte wol gezemen .
2401,2 den fride mines herren . ob ir den rvchet nemen .
2401,3 ez chvmt noch an die stunde . vil liht in churcer cit .
2401,4 daz ir in gerne naemet vn- in iv danne niem- git ."
- 2402,1 "Ia neme ich e die svone ." sprach do Hagene .
2402,2 "e ih so lasterliche . von eime degene .
2402,3 flvhe meister Hildebrant . als ir habt hie getan .
2402,4 ich wande dar ir kundet . baz gein viande stan ."
- 2403,1 Do sprach meister Hildebrant . "z wiv v'wizzet ir mir daz .
2403,2 nv wer was d' vf eime schilde . vor dem Waschenstein saz .
2403,3 do im von span Walther . so vil d' frivnde slvoc .
2403,4 ovch habt ir noch ze zeigen . an iv selben genvoc ."
- 2404,1 Do sprach d' fvrste dietrich . "wie zimt daz helede lip .
2404,2 daz si svln schelten . sam div alten wip .
2404,3 ich v'bivt iv Hildebrant . daz ir iht sprechet mer .
2404,4 mich ellenden rechen . twingent grozlichiv ser ."
- 2405,1 "Lat hoeren frivnt Hagene ." sprach do Dietrich .
2405,2 "waz ir e redetet . ir rechen lobelich .
2405,3 do ir mih gewafent . zvoz iv sahet gan .
2405,4 ir iaht daz ir eine . mit strite woldet mich bestan ."
- 2406,1 "Ia ne lovgent iv des niem- ." sprach Hagene d' degen .
2406,2 "i ne welle ez hie v'svochen . mit stichen un- mit slegen .
2406,3 ez en si daz mir zebreeste . daz Nibelunges swert .
2406,4 mich mvot daz mines herren . vn- min ze gisel ist gegert ."
- 2407,1 Do d' reche erhorte . den grimm- Hagenen mvot .
2407,2 den schilt vil balde zvchte . d' snelle degen gvot .
2407,3 wie balde gein im Hagene . von d' stiegen spranch .
2407,4 Nibelunges swert daz gvote . vil lvot vf Dietriche erchlanch .

- 2408,1 Do wesse wol her Dietrich . daz d' chune man .
2408,2 vil grimmes mvtes waere . schermen im began .
2408,3 d' voget von Berne . vor angestlichen slegen .
2408,4 wol erchand er Hagenen . er was ein vzerwelter degen .
- 2409,1 Ovch vorht er balmungen . ein wafen starch genvoc .
2409,2 vnd'wilen Dietrich . mit listen wid' slvoc .
2409,3 vnze daz er Hagenen . mit strite doch betwanch .
2409,4 er slvog im eine wnden . div was tief vn- lanch .
- 2410,1 Do daht d' herre Dietrich . "dv bist in not erwigen .
2410,2 ih han es luzzil ere . solt v nv tot geligen .
2410,3 ich wil ez svs v'svchen . ob ich ertwingen chan .
2410,4 dich mir z einem gisel ." daz wart mit sorgen getan .
- 2411,1 Den schilt lie vallen Dietrich . sin sterche div was groz .
2411,2 mit beiden sinen armen . er Hagen- vmbsloz .
2411,3 do wart von im betwngen . d' vil chvene man .
2411,4 Gunth' d' vil edele . dar vmbe trvrin began .
- 2412,1 Hagenen bant do Dietrich . vn- fvrt in da er va-t .
2412,2 die edeln Chriemh' . vn- gab ir bi d' hant .
2412,3 den chvnisten rechen . d' ie swert getrvoc .
2412,4 nach ir vil starchem leide . do wart ir liebe genvoc .
- 2413,1 Vor frevden neich dem rechen . daz Ezeln wip .
2413,2 "imm' si dir saelic . din herce vn- ovch din lip .
2413,3 dv hast mich wol ergezzet . nach aller miner not .
2413,4 ich sol ez immer dienen . mich en wend es d' tot ."
- 2414,1 Do sprach d' herre Dietrich . "ir svlt in lan genesen .
2414,2 vil edeliv kvnig- . ez mac vil wol noch wesen .
2414,3 daz ivch sin dienst ergezzet . des er iv hat getan .
2414,4 er sol des niht engelten . daz man in siht gebunden stan ."
- 2415,1 Do hiez si fvren Hagen- . an sin vngemach
2415,2 da er lac beslozen . vn- da in niemen sach .
2415,3 Gunth' d' kunec edele . rvfen do began .
2415,4 "war chom d' helt von Berne . er hat mir leide getan ."
- 2416,1 Do gie im hin begegene . der herre Dietrich .
2416,2 daz Gunthers ellen . daz was so lobelich .
2416,3 er n beite do niht mere . er lief her fvr den Sal .
2416,4 von ir beid' sw'ten hyp sich ein vngefvger schal .
- 2417,1 Swie vil d' herre Dietrich . lange was gelobt .
2417,2 Gunth' was . so sere . erzvrnet vn- ertobt .
2417,3 wand er nach starchen leiden . sin hercevient was .

- 2417,4 man sagt ez noch fvr wnder . daz do Dietrich ie genas .
- 2418,1 Ir ellen vn- ir sterche . beide warn groz .
2418,2 Palas vn- tvrne . von den slegen doz .
2418,3 do si mit swerten hewen . vf die helme gvot .
2418,4 ez het d' kunic Gunth' . einen h'lichen mvot .
- 2419,1 Sit twange in d' von Berne . sam Hagenen e geschach .
2419,2 daz blvot man durch die ringe . dem helde vliezen sach .
2419,3 von eime scharpfen sw'te . daz trvoc her Dietrich .
2419,4 doch het gewert Gunther . nach mvde lobeliche sich .
- 2420,1 Der herre wart gebunden . von Dietriches hant .
2420,2 swie kunige nie ne solden . liden solhiv bant .
2420,3 er daht ob er sie lieze . vngebunde- wesen .
2420,4 daz si zwene in me lande . niem- liezen genesen .
- 2421,1 Der Vogt von Berne . d' nam in bi d' hant .
2421,2 do braht er in gebunden . da er Chriemh' vant .
2421,3 do was mit sime leide . ir sorge ein teil benomen .
2421,4 si sprach "chunic Gunth' . sit mir groze willechomen ."
- 2422,1 Er sprach "ich solt v nigen . vil edel swest' min .
2422,2 ob iw' grvezen moehte . genedichlich' sin .
2422,3 ich weiz ivch kvnig- . so zornic gemvot .
2422,4 daz ir mir vn- Hagen- . vil swachez grvzen getvot ."
- 2423,1 Do sprach d' helt von Berne . "vil edel kuniges wip .
2423,2 ez en wart nie gisel mere . so gvot' ritt' lip .
2423,3 als ich iv frowe here . an in gegeben han .
2423,4 nv svlt ir die ellenden . min vil wol geniezen lan ."
- 2424,1 Si iach si taet iz gerne . do gie d' chune man .
2424,2 mit weinenden ovgen . von in balde dan .
2424,3 si rach sich gremliche . daz ezeln wip .
2424,4 den vzerwelten degenen . nam si beiden den lip .
- 2425,1 Si lie si ligen svnder . dvrch ir vngemach .
2425,2 daz ir sit dewedere . den andern nie gesach .
2425,3 swie ez v'lobt hete . daz vil edele wip .
2425,4 si daht "ich geriche hivte . mins vil lieben mannes lip ."
- 2426,1 Do gie div kunig- . da si Hagenen sach .
2426,2 wie reht erbolgenliche . si zvo dem rechen sprach .
2426,3 "welt ir mir geben wid'e . daz ir mir habt genomen .
2426,4 so mvget ir mit dem lebene . wid' z en Burgonden chomen ."
- 2427,1 Do sprach d' grimme Hagen- . "div rede ist gar v'lorn .

- 2427,2 vil edeliv kvnig- . ia han ich des gesworn .
2427,3 daz ich den hort iht zeige . die wile dehein' lebe .
2427,4 d' minen edelen herren . vn- in niemanne gebe ."
- 2428,1 Er wiste wol div maere . si ne liezen in niht genesen .
2428,2 wie mohte ein vntriwe . imm' stercher wesen .
2428,3 er vorhte so si hete . im sinen lip genom- .
2428,4 daz si danne ir brvod' . lieze heim ze lande chom- .
- 2429,1 "Ich bring ez an ein ende ." gedaht daz edel wip .
2429,2 do hiez si ir brvod' . nem- den lip .
2429,3 man slvog im abe daz hovbet . bi hare si ez trvoc .
2429,4 fvr den helt von Tronege . do warde im leide genvoc .
- 2430,1 Also d' vngemvot . sins herren hovbet sach .
2430,2 wid' chriemh' . do d' reche sprach .
2430,3 "dv hast ez z eime ende . nach dime willen braht .
2430,4 vn- ist ovch rehte ergangen . als ich mir hete gedaht .
- 2431,1 Nv ist vo- Bvrgonden . d' edel kunec tot .
2431,2 Giselh' vn- Volker . Danchwart vn- Gernot .
2431,3 den hort den weiz nv niemen . wan got vn- min .
2431,4 d' sol dich Vaelaendinne . imm' wol v'holn sin ."
- 2432,1 Si sprach "so habt ir vbele . geltes mich gewert .
2432,2 so wil doch ich behalten . daz Sivrides swert .
2432,3 daz trvoc min hold' vriedel . do ir im namet den lip .
2432,4 mortlich mit vntriwen ." sprach do daz iam'hafte wip .
- 2433,1 Si zoch ez von d' scheiden . daz en chund ' niht gewern .
2433,2 do dahte si den rechen . des libes vol behern .
2433,3 si hvb ez mit ir handen . daz hovpt si im abe slvoc .
2433,4 daz sach d' kunic Ezele . do was im leide genvoc .
- 2434,1 "Wafen" sprach d' furste . "wie ist nv tot gelegen .
2434,2 von eines wibes handen . d' allerbeste degen .
2434,3 d' ie chom ze stvrmen . od' ie schilt getrvoc .
2434,4 swie vient ich im waere . ez ist mir leide genvoc ."
- 2435,1 Do sprach meist' Hildebrant . "ia ne genivzet si es niht .
2435,2 daz si in slahen torste . swaz halt mir geschiht .
2435,3 swie er mich selben braechte . in angestliche not .
2435,4 idoch so wil ich rechen . des vil chvnen rechen tot ."
- 2436,1 Hildebrant mit zorne . zvo Chriemh' spranch .
2436,2 er slvoc d' chuniginne . ein- grimmen swanch .
2436,3 ia tet ir div sorge . von dem degene we .
2436,4 si mohte lvzzil helfen . daz si so angestlichen scre .

- 2437,1 Do was gelegen aller . da d' veigen lip .
2437,2 ze stvchen lac v'howen . do daz edel wip .
2437,3 Ezel vn- Dietrich weinen do began .
2437,4 si chlageten iaem'liche . alle ir mage vn- man .
- 2438,1 Div vil michel ere . was da gelegen tot .
2438,2 die lvte heten alle . iamer vn- Not .
2438,3 mit leide was v'endet . des kuniges hochgecit .
2438,4 als ie div leibe leide . an dem ende gerne git .
- 2439,1 I ne chan ivch niht bescheiden . waz sid' da geshach .
2439,2 wan christen vn- heiden weinen man do sach .
2439,3 wibe vn- knehte . vn- manige schone meit .
2439,4 die heten nach ir frivnden . die all'grozisten leit .
- 2440,1 I ne sage iv nv niht mere . von d' grozen not .
2440,2 die da erslagen waren . die lazen ligen tot .
2440,3 wie ir di-ch an geviengen . sit der Hvnen diet .
2440,4 hie hat daz maere . ein ende . daz ist d' Nibelunge liet .